



Peticion cu mas di 8000 firma pa aumenta castigo pa Hit & Run



Página 6

• **Su Mahestad Rey Willem-Alexander lo bishita Aruba dia 18 di maart**
Página 4

• **Venezuela ta libera al menos 80 prisionero politico, segun NGO**
Página 10

• **Restauracion ecologico ta e base principal pa por haci Aruba 'berde' atrobe**
Página 2

Anuncio di cabana priva riba Airbnb ta genera debate tocante acceso publico na beach



Página 3

Merca y Israel ta alinea riba e siguiente pasonan pa e segundo fase di plan pa Gaza




Página 18

Homber asesina pa agentenan federal Mericano tabata enfermero "cu kier a haci un diferencia"



Página 24



Bingo at Seven!

Turning Monday into Wins

\$2,500 in Total Prizes

Progressive Jackpot starting at \$25,000

Monday, January 26th from 7:00 PM - 9:00 PM

Buy-in: \$12. Buy 2 Bingo Cards and get the 3rd for \$4

THE CASINO AT

ST REGIS

ARUBA

Aruba Conservation Foundation determina pa cumpli cu su responsabilidad legal Restauracion ecologico ta e base principal pa por haci Aruba ‘berde’ atrobe

E trabao pa rescata y preserva naturalesa di Aruba no ta facil. Pero Aruba Conservation Foundation tin un responsabilidad legal pa cumpli cune, y como tal mester cuminsa chikito. Asina Director di Conservacion, Natasha Silva a splica Bon Dia Aruba.

A tene un entrevista amplio cu Silva y Edeline Berg, ehecutivo di ACF encarga cu business development y comunicacion di ACF riba e logronan, retonan y planan pa futuro di e fundacion. Manera ta conoci, ACF tin e cargo pa maneha Parke Nacional Arikok, un total di 16 otro area rond Aruba y tambe e parke marino di Aruba.

Ley ta tene e organisacion responsabel pa conservacion y preservacion di e areanan aki, ademas di educa comunidad riba preservacion di naturalesa di Aruba. Na ultimo lug,

segun e mesun ley, ta bin reaccion responsabel.

Den e sentido aki, ACF ta contento cu Prome Minister Mike Eman, kende ta encarga cu naturalesa, a pone como su prioridad, plantamento di mata. Sinembargo, conservacion no ta nifica djis planta mata. Es mas, “nos no usa e termino ‘reforestacion’ cu ta un termino industrial. Ta trata di un termino cu tabata pa planta kilometernan largo di e mesun mata, un sistema artificial. A resulta cu e sistema aki tabata teribel pa biodiversidad.

Nos a conseha Prome Minister riba un multitud di manera pa haci Aruba berde, for di e aspecto ornamental te realmente restauracion di naturalesa. Pues, nos di ACF ta conecta cu Prome Minister riba e area di restauracion ecologico,” Natasha Silva a bisa Bon Dia Aruba.

E restauracion ecologico ta un trabao dificil pasobra otro realidad ta cu Aruba durante siglonan despues di yegada di Europeonan a perde practicamente tur mata grandi. “Por bisa cu e naturalesa di Aruba ainda ta den proceso di regeneracion y recuperando mas cu e por, pasobra nos no sa con e tabata prome cu tempo colonial. Kizas nos a perde especienan, pero nos no sa cua. Spera cu den futuro tin mas informacion,” Silva a bisa.

Locual ACF ta haci ta tira bista riba e naturalesa actual y trata di trece na un nivel cu ta miho cu locual e ta awor. “Nos ta mira tur caminda señal di degradacion y impacto. Nos lo conecta pues cu e programa di reforestacion di Sr. Eman cu nos proyecto di restauracion ecologico.”

Y esaki ta nifica cu e aña aki lo cuminsa cera algun area chikito cu waya y otro material pa exclui cabrito y burico, pa cuminsa planta matanan cu ta cuadra cu e habitat. “Ta depende cuanto fondo tin disponible pasobra pa traha e curanan, e ta costa hopi placa. Pues, e cabritonan los ta costa nos di ACF hopi placa, pasobra nos no por haci restauracion ecologico sin inverti den e wairanan.”

E zonanan cu ta inclui e pida terenonan cera lo ta patras di Tierra del Sol cu ta cay bao maneho di ACF, tambe na Ser'i Teishi, den Arikok y probablemente na Bubali, rond di e plas. “Nos lo tin por lo menos tres na 2026. Tur ta area diferente, identifica pa e mapa di vegetacion. Nos ta investigando e habitatnan, cua ta e especienan di mata cu ta pertenece na e area.”

Silva a splica cu e propagacion di mata ta bay ta di acuerdo cu e necesidad di e habitat specifico. “Tin biaha nan tin especienan cu ta den otro area tambe, pero tin zona na Aruba unda tin matanan specifico ta crece. Esey ta locual nos ta preparando.”

E proyecto aki lo ta uno di termino largo cu ta e intencion di ACF, esta pa hinca energia serio den restauracion, cu ta bay tuma hopi esfuerso, conscientisacion y inversion. Particularmente pasobra nan lo ta proyectonan cu ta bay tuma tempo pa muestra nan



resultado.

“Nos ta bay stop di haci proyectonan ‘cute,’ aki aya, stop di reacciona riba kico kier pa nos haci. P’esey mes, durante e periodo di Covid nos a haci un introspeccion profundo pa mira kico e ley ta bisa, kico nos responsabilidad real ta y cua ta e tratadonan na cua nos ta mara.” Den otro palabra, ACF a dicidi cu su empeño ta pa determina kico naturalesa di Aruba mester, basa riba Derecho di Naturalesa. Asina por chempel a stop e actividad di UTV/ATV den tereno di Parke Nacional Arikok.

E reto ta pa laga esnan cu ta financia ACF compronde cu proyectonan ‘cute’ di duracion cortico no ta na interes di e meta grandi, cu ta restauracion di naturalesa. “Hopi biaha kier proyecto cu ta duna resultado instantaneo, pero naturalesa no ta traha asina,” Silva a muestra. “Nos a tuma e curashi pa muestra kico si ta posibel.”

Den e siguiente parti di e serie riba trabao di ACF lo amplia riba e areanan cu ta bay cera pa cabrito y e reto di conservacion riba un isla cu ta hopi pobla.



Anuncio di cabana priva riba Airbnb ta genera debate tocante acceso publico na beach

Un publicacion di Facebook cu ta cuestiona e legalidad di un cabana priva riba beach cu ta aparece riba Airbnb a lanta un debate publico amplio tocante acceso na playa, derechonan di tereno, y supervision di gobierno. E publicacion rapidamente a saca reaccionnan fuerte di residentenan cu a expresa preocupacion y frustracion.

E publicacion original ta bisa cu un cabana priva riba beach ta ser ofreci riba e plataforma Airbnb pa uso durante dia solamente, cu prijsnan cu ta varia entre US\$400 y US\$600. E autor ta cuestiona si un arreglo asina ta legal riba loke ta ser percibi como un beach publico, skirbiendo cu Aruba ta parce di ta “bendiendo cada pida di su beach y isla” y puntando si tin hende cu por clarifica si e practica aki ta permiti riba areanan publico na costa.

E tema a toca un nervio sensibil cerca hopi Arubiano, como cu acceso publico na beachnan pa hopi tempo ta ser considera como un derecho fundamental riba e isla. Pa ley, beachnan na Aruba ta publico, y acceso na e liña di costa te na e marca di awa halto ta protegi. Sinembargo, e liña precies cu ta marca unda e playa publico ta cuminsa y propiedad di hotel priva of huur ta caba hopi biha no ta cla pa e publico en general, loke ta conduci na disputanan y mal entendimiento cu ta ripiti.

Algun ora despues cu e publicacion a ser comparti, e seccion di comentario a yena cu reaccionnan cu a refleha un mescla di rabia, skepticismo, y yamadonan pa responsabilidad. Varios a usuario a enfoca nan critica riba loke nan ta percibi como un falta di aplicacion y control di gobierno. Un comentario a argumenta cu departamentonan regulatorio no ta logra actua, alegando cu oficialnan ta pasa nan dianan inactivo mientras cu ciudadanonan comun y coriente ta ser forsa pa lucha financieramente. Di acuerdo cu e punto di bista aki, aplicacion tin e tendencia di ta limita na advertencia en bes di castigo significativo, permitiendo practicanan cuestionabel pa sigui. E usuario a conclui bisando cu Aruba a bira un “Banana Republik,” caminda hende ta actua sin consecuencia.

Otro usuario a bay mas leu cu



e asunto specifico di cabana y a atende comportacion social mas amplio. Un comentarista a critica cu hopi biaha ciudadanonan ta vocifera nan malcontento y indignacion riba rednan social, pero no ta tuma accion concreto, declarando cu hendenan ta lihe pa keha online pero no ta dispuesto pa para tras di protesta of activistanan cu ta trece e mesun preocupacionnan aki dilanti publicamente. El a describi e dinamica aki como profundamente decepcionante y refleho di un problema social mas grandi.

Varios comentario a enfatisa e principio di acceso na beach publico den idioma mas fuerte. Un usuario a expresa su malcontento cuestionando si derechonan di tereno y politica di beach tabata ser ignora completamente. Otro usuario a insisti cu si nan tabata desea di usa e beach caminda e cabana tabata situa, nan lo por trece nan propio stoel y pertenencianan y pone nan directamente dilanti di e cabana, desafiando cualkier hende cu por a purba di move nan. E comentario aki a reitera cu e beachnan di Aruba ta pa publico y no mester ser trata como propiedad priva.

No tur usuario a comparti e mesun interpretacion. Algun usuario a argumenta cu practicanan similar a existi pa aña, particularmente bou di hotelnan grandi cu ta propaganda “beachnan priva” den materialnan di mercadeo internacional. Di acuerdo cu e usuarioman aki, e berdadero asunto no ta e cabana priva mes sino e falta di gobierno pa comunica y aplica e distincion entre acceso na beach publico y propiedad di hotel priva. Nan a sugeri cu autoridadnan mester declara explicitamente cu beachnan ta publico mientras ta zorg pa e fronteranan di propiedad ta

bon marca y respeta.

Otronan a expresa un sentido di perdida y renuncia, declarando cu poco poco Aruba ta ser kita pida pa pida. Un usuario a expresa cu situacionnan asina ta “kibra su curason”, advertiendo cu e isla ta bayendo perdi “poco poco.” Un otro comentario a sugeri cu e desaroyo continuo y comercializacion eventualmente lo por forsa localnan pa bandona e isla pa busca miho oportunidadnan otro caminda, criticando tanto gobierno como partidonan politico mientras ta expresa nan preocupacion pa preservacion di medio ambiente.

E debate tambe a inclui yamadonan pa transparencia. Un usuario a declara cu e situacion por ser aclara facilmente door di revisa e documentacion di permiso di e cabana, señalando cu residentenan comun mester pasa door di procesonan di aprobacion extenso pa construi casnan, mientras cu desaroyonan grandi ta parce di sigui cu facilidad. E comentario aki a cuestiona si e permisonan apropia a ser otorga y si nan mester ser haci publico.

Na mesun momento, un cantidad di usuario a critica contra loke nan a mira como reaccionnan emocional of no informa. Un usuario a argumenta cu hopi hende cu ta comenta no ta usa beach regularmente y ta reacciona principalmente riba e entrada cu ta ser genera en bes di e presencia di e cabana mes. E usuario aki a sugeri cu si hende ta opone e cabananan, nan mester simplemente sigui usa e playa manera custumber door di pone nan pertenencianan nan dilanti y disfruta di e beach, en bes di critica online cada biaha.


Otro usuario a urgi otronan pa verifica si e cabana ta ber-

daderamente situa riba tereno di beach publico, consehando hende pa controla e liñanan di frontera oficial di e hotel of propiedad envolvi. Di acuerdo cu e perspectiva aki, e cabana por ta situa dentro di un area priva legalmente defini en bes di riba liña di costa publico. E usuario aki a señala cu hopi participante den e discusion tabata haci suposicionnan sin compronde e distincionnan legal entre beach publico, tereno di huur y propiedad priva.

Di mesun manera, un otro comentario a enfatisa e importancia di verifica si e operador tin un permiso of precario valido, cu lo permiti uso temporal of condicional di e tereno. Di acuerdo cu e punto di bista aki, si e permisonan necesario ta na luga, e cabana por ta legalmente permiti, hasta si e ta impopular cerca publico.

E discusion online ta subraya un reto recurrente na Aruba: balansa desaroyo impulsa pa turismo cu proteccion di espacionan publico y derechonan local. Como cu turismo ta keda e motor economico principal di e isla, facilidadnan canto di lama y experiencianan exclusivo ta ser promociona mas y mas na bishitantenan dispuesto pa paga prijsnan premium. Na mesun momento, residentenan ta keda profundamente mara na acceso habri na beachnan, cu ta central pa bida diario, identidad cultural y igualdad social.

E concepto di experiencianan di beach “priva” ta controversial pa hopi tempo caba na Aruba. Mientras cu hotel y resortnan hopi biaha ta provee servicio exclusivo manera stoel, cabana y servicio di cuminda, e principio profundo ta keda cu e beachnan mes ta publico. Confusion ta surgi ora señalnan visual, señalizacion,



of comportacion di personal ta crea e impresion cu cierto areanan ta “off-limit” pa bishitantenan cu no ta paga, hasta ora esey no ta legalmente e caso.

E incidente aki tambe ta enfatisa e rol di rednan social manera un espacio pa debate civico. E publicacion di Facebook no a presenta documentacion verifica of declaracionnan oficial, y toch el a logra mobilisa discusion publico y hala atencion na preocupacionnan di gubernacion mas amplio. E comentarioman ta revela no solamente interpretacionnan legal diferente, pero tambe frustracion profundo tocante aplicacion, transparencia y desigualdad percibi.

Hopi usuario, a pesar di nan desacuerdonan, a comparti un preocupacion profundo comun, e futuro di e beachnan di Aruba y ken berdaderamente ta beneficia di nan uso. Sea ta boga pa aplicacion mas estricto, comunicacion mas cla, of mas compromiso civico, e discusion ta refleha un lucha continuo pa defini e balansa entre oportunidad economico y acceso publico.

E polemica ta sirbi como un recordatorio cu e politica di beach na Aruba no ta simplemente un asunto huridico pero un tema profundamente emocional y cultural. Segun cu turismo ta sigui desaroya y modelonan di negoshi nobo ta surgi, preguntanan tocante propiedad, acceso y husticia probablemente lo keda un tema relevante den discusion publico.

Su Mahestad Rey Willem-Alexander lo bishita Aruba dia 18 di maart pa conmemora 40 aña di Status Aparte



Aruba lo ricibi Su Mahestad Rey Willem-Alexander dia 18 di maart, marcando un momento historico den e trayecto politico moderno di e isla mientras e ta celebra 40 aña di Status Aparte y 50 aña di su bandera y himno nacional. E bishita, anuncia pa e website oficial di e Cas Real Hulandes, ta bini na un momento di celebracion y enfoka renoba riba e logro y perspectivanan di futuro di e isla.

E bishita Real aki lo ta estrechamente mara na Aruba su conmemoracion di Status Aparte, un logro constitucional Realisa pa prome biaha dia 1 di januari 1986, ora cu Aruba a bira un pais constituyente dentro di Reino Hulandes, separa for di Antias Hulandes. Dia di Himno y Bandera, celebra anualmente riba 18 di maart, ta honra e herencia aki y ta un di e fiestanan nacional mas stima di e isla, brasando e identidad cultural y autonomia politico di Aruba.

Di acuerdo cu e anuncio di palacio, e agenda di e Rey lo enfoca riba tanto e nificacion historico di e aniversario aki como e logro y retonan actual cu Aruba ta enfrenta. Lo pone enfasis riba e desaroyo cu e isla a conoce for di 1986 y e esfuersonan continuo pa fortalece su institucionnan social, economico y civico. E programa ta refleha no solamente e celebracion di Aruba su identidad y orguyo, pero

tambe un reconocimiento di e lasonan profundo y duradero entre Aruba y Reino mas amplio.

Mas recientemente, e monarca a regresa e isla na fin di januari 2023 como parti di un tour di introduccion di e Famia Real Hulandes di e partinan Caribense di Reino, compana pa Reina Máxima y nan yiu muhe mas grandi, Catharina-Amalia, Prinses van Oranje.


Historicamente bishitanan Real tabata un momento di hopi interes publico na Aruba. E ocasionnan aki a muestra con residente y bishitantenan mescos hopi biaha ta reuni na gran cantidad pa yama e monarca Hulandes bon bini y pa participa den festividadnan cultural. Durante bishitanan anterior, Su Mahestad Rey Willem-Alexander y Reina Maxima a compromete cu studiantenan, lidernan empresarial, representantenan cultural, y funcionarionan di gobierno, subrayando e relacionnan multifacetico cu ta mara Aruba na Reino Hulandes. Bishitanan asina tin e tendencia di balansa tareanan ceremonial cu oportunidadnan genuino pa dialogo y conexio. Den hopi manera, nan ta fungi como afirmacionnan simbolico di respet y asociacion mutuo.

E bishita di e aña aki, sinembargo, ta carga un peso historico agrega. E di 40 aniversario di Status Aparte ta invita tanto celebracion como reflexion. Durante cuater decada, Aruba a desaroya institucionnan democratico robusto, un identidad cultural distinto, y un sociedad civil vibrante. E logro di 50 aña di bandera y himno nacional ta enfatisa mas ainda e nificacion di simbolonan comparti cu ta uni Arubianonan a traves di generacionnan. Discusionnan local rond di e aniversario aki a extende mas leu cu ceremonia, tocando temanan di gobernacion, progreso social, y e fortalecimiento continuo di derechonan di ciudadano — emblematico di e trayecto evolucionante di e isla manera un pais cu ta goberna su mes.

Cu dia 18 di maart ta acercando rapidamente, e anticipacion ta creciendo den henter Aruba. Pa hopi, e bishita di Su Mahestad Rey Willem-Alexander ta mas cu un momento conmemorativo — e ta un recordatorio di e lasonan duradero di amistad y historia comparti dentro di Reino Hulandes, y un testamento di e resiliencia y spirito di e pueblo Arubano.



Tormenta di sneeuw na Merca ta causa interrupcionnan di vuelo afectando biaheronan di Aruba



Un tormenta di sneeuw poderoso cu ta pasando na e parti noord oost di Merca ta creando efec-tonan rond mundo, incluyendo interrupcion di vuelonan cu ta impac-tando pasaheronan cu a bula for di y pa Aruba durante e weekend.

Loke a cuminsa como clima di winter tipico a evoluciona den un tormenta di sneeuw significante cu ta afecta ciudadnan grandi na Merca, manera New York, Newark y Boston. Servicio nacional di clima a informa sneeuw generalisa, biento fuerte y condicionnan peligroso den e regionnan aki, loke a pone cu aeropuertonan a reduci operacionnan y cancela vuelonan. Hopi di e vuelonan afecta ta inclui rutan cu ta bin of saliendo for di Aeropuerto Internacional Reina Beatrix di Aruba.

Aeropuerto di Aruba a registra varios cancelacion caba, por lo menos cinco vuelo programa pa diadomingo a ser cancela, cu vuelonan adicional pa awe tambe na peligro. Mayoria di e cancelacionnan ta origina for di ciudadnan den e parti noordoost di Merca — e mesun areanan mas afecta pa e tormenta. Notificacionnan di aeropuerto a conseha pasaheronan pa check nan status di vuelo di cerca prome cu bay aeropuerto, ya cu e condicionnan ta sigui evolucionar.

A pesar di e interrupcionnan, operacion di aeropuerto na Aruba mes a keda normal, cu personal di tera ta sigui procesa vuelonan y asisti pasaheronan di e miho forma posibel mirando e situa-

cion.

E tormenta di sneeuw, inoficialmente yama Fern pa The Weather Channel, ta un sistema di clima grandi cu ta pasa den gran parti di Merca, treciendo sneeuw pisa, ijs peligroso, y aire friu di Artico pa un parti grandi di e pais. Pronosticonan ta bisa cu e tormenta, a impacta mas cu 220 miyon hende den decenas di estado segun cu el a move durante fin di siman, bahando sneeuw y ijs significante y causa advertencia extenso di clima di winter.

E combinacion di friu extremo y precipitacion di winter di e tormenta a conduci na condicionnan di biahe peligroso, interrupcion di coriente generalisa y declaracionnan di emergencia den varios region. Meteorologonan a adverti cu e aire intenso di Artico tras di Fern por tin temperaturanan peligrosamente abou pa dias, aumentando e riesgo di condicionnan peligroso prolonga riba caminda y den comunidanan den henter e trayecto di e tormenta.



Editor

Caribbean Speed Printers N.V.
Aruba Bank N.V. Acc. #332668
Caribbean Mercantile Bank N.V.
Acc. #23951903
RBC Royal Bank Acc. #13307728

Operations Manager

Mariette Engelhart-Boekhoudt

Redaccion

noticia@bondia.com

Pilar Flores (hefe di redaccion)
Angenette Figueroa (closer editor)
Leo Maduro
Dilma Arends
Raisa Montilla
Oriana Geerman

Ehecutivo di Benta

Sulaika Croes
sulaika.croes@cspnv.com
Mark Gomes
mark.gomes@cspnv.com

Aviso y Arte

Sandra Loefstop
Lisa Tromp

Departamento Digital

Juan Luis Pinto

Administracion
accounting@bondia.com

Martha Arteta de Ariza

Distribucion

Jenny Kelly

Coleccion

Evelinda de Cuba - Tromp

Pre Press

Luis Fernando Arenas (Hefe)
Pablo Libre

Press

Roland Schenker (Hefe)
Omar Ramirez
Martin Boekhoudt
Francis Dirks

Colaboracion

Associated Press
Ret Karibense

Data Key

Afiliacion

Sociedad Interamerica
di Prensa (SIP)

DIRECCION

Adres: Weststraat #22
Tel: 582-7800
Email: noticia@bondia.com
aviso@bondia.com
info@bondia.com
Website: www.bondia.com
Facebook: @bondianoticia
Instagram: bondiaaruba

BON DIA ARUBA ta un corant redacta y imprimi na Aruba y ta obenibel di dialuna te cu diasabra. Ningun contenido por wordo reproduci sin permiso di editor.

Un biaha mas, e talento di hubentud Arubano ta resalta

Quiana Cronie, un inspiracion pa nos hubentud y loke nos por logra cu confiansa den nos mes y perseverancia

Recientemente pueblo di Aruba a sinti orguyo ora cu a anuncia cu un hoben local di nos isla, Quiana Cronie, a yega e logro grandi di ricibi e premio Rising Star Award.

E logro aki no solamente ta trata recepcion di e premio, sino tambe e oportunidad di representa nos isla riba escenario internacional y di alto nivel na New York Fashion Week, halsando di nos isla stima mientras e ta hiba su carera na e proximo nivel.

Bon Dia Aruba a haya e oportunidad di papia cu Quiana y conoce e persona sumamente talentoso tras di e marca Cashaca.

Na momento di introduci su mes, Quiana a presenta su mes como un "diseñadora di Aruba, guia pa conta storia, cultura y durabilidad. Creatividad ta un parti di mi bida for di ora cu mi por cuminsa corda. Mi a crece na Savaneta, coriendo pia abao rond di nos cunucu, curioso, subiendo mata, coriendo bais door di e bario, rondona di bestia y semper creando cu mi mannan. Mi mayoran, specialmente mi mama cu ta un artista, a impulsa cu amor e curiosidad aki pa medio di involucra mi den workshopnan di arte for di un edad trempa."

El a expresa cu loke mas ta defini e como persona ta e conexion profundo cu su herencia, "mi respet pa materialnan y mi creencia cu diseño semper mester carga un nificado su tras. Via paña, obhetonan y conta storia visualmente, mi ta usa diseño como un manera pa preserva storianan, honra resiliencia y crea balornan emocional duradero cu ta uni e dialogo entre pasado y futuro," el a agrega.

Segun Quiana a sigui conta, inicialmente e tabatin e intencion di studia negoshi pa motibo cu e tabata kier independencia y crea algo di su mes. Sinembargo, durante 2026, el a uni un curso preparatorio na AFADA na Aruba lidera pa Glen Godijn. E experiencia aki tabata uno "transformativo, el a yuda mi realisa cu creatividad no tabata solamente un hobby, e tabata mi yamado."

El a explora diseño grafico, fotografia y pelicula, pero un punto decisivo a yega ora cu el a "transforma un T-shirt durante un curso. Mi a transforma un T-shirt bieu di AHATA y converti esaki den un declaracion tocante e isla su problema cu dump y a organisa un photoshoot na dump mes. E respuesta tabata sumamente grandi. E momento aki ta loke a resulta den mi prome linea di T-shirt, QC Apparel, cual tabata un exito."

For di aki, el a muda pa Hulanda pa studia Product Design na Design Academy Eindhoven. Su trabao poco poco a evoluciona y converti den diseño cu por bisti, enfoca riba "forma, funcion, materialnan y durabilidad. Durante tempo,



esaki naturalmente a crece den moda y como un manera di conta storia, cultura y sostenibilidad, y eventualmente den Cashaca."

Nos tur den bida ta encontra cu obstaculo, limitacionnan of dificultadnan cu nos mester surpasa pa por sigui padilanti, y Quiana no tabata un excepcion. El a conta cu "manera hopi persona creativo, duda propio tabata un di e desafionan mas grandi cu mi a enfrente despues di gradua y drenta e mundo real, specialmente ora di converti un pasion den un profesion. Limitacionnan financiero tabata hopi real. Mi mester a acepta un trabao full-time y traha cualkier trabao cu por cubri e gastonan, spaar na banda mientras mi tabata inverti den mi vision. Despues di trabao, mi a pasa un gran cantidad di anochi laat ta crea e fundeshi di Cashaca. E tabata agotador, y tabatin hopi momento di dificultad."

El a agrega cu mientras e tabata crece, e presion tabata aumenta e sentimento cu esaki "mester funciona, di otro manera mi lo ta pega den un trabao cu no ta alinea completamente cu ken mi ta. I mi ta kere berdaderamente cu persigui un carera creativo ta rekeri bay all-in; compromete completamente mientras bo ta compronde cu progreso ta poco poco y cu sacrificionan real di tempo, placa y energia ta inevitable. Te hasta awo, ainda mi ta siñando con pa balansa mi trabao full-time, e trabao di mi marca Cashaca, famia, amistadnan y tempo pa mi mes."

Sinembargo, Quiana tambe a comparti

e parti positivo di esaki, contando nos cu cada desafio a reforsa e importancia di confiansa, "confiansa den mi mes, den e proceso y den e storianan cu mi kier ra conta. Hopi biaha mi ta corda mi mes, 'sopi pura ta sali salo.' Un fundeshi fuerte ta tuma tempo y ta e elemento clave pa haci esaki funciona. Despues di 5 aña ta construi e marca aki, mira tur cos bin den otro na Aruba Fashion Week tabata sumamente emocional. E audienzia tabata emociona y inspira pa e coleccion cual tabata pa mi un gran exito. E reconocimiento cu mi a ricibi aya a bin via un proceso oficial lidera pa Albania Rosario, banda di un comite distingui como parti di FDLA su Emerging Talent Support Program. E momento aki a nifica mas cu un validacion personal; el a sinti como un prueba cu tur loke mi a imagina finalmente ta birando realidad. Representando Aruba riba un escenario internacional y contribuyendo na con e isla ta mira mas aleu di su lamanan, como un luga di creatividad, moda y un cultura cu ta pensa padilanti ta algo di cual mi ta increíblemente orguyoso. Mi ta profundamente gradici na tur esnan cu a kere den mi vision for di comienso. Sin mi famia y amistadnan cu a sostene mi, mi no lo a logra yega asina leu."

Den e proximo edicionnan, nos lo sigui comparti e storia di Quiana, uno yen di resiliencia, dedicacion y perseverancia, cu confiansa den su mes y un amor profundo pa su isla.

Potretan saca pa Esteban Buitragobph y Team Informa Models na Aruba Fashion Week



Peticion cu mas di 8000 firma pa aumenta castigo pa Hit & Run

Diasabra atardi, un grupo basta grandi a presenta na gobierno cu mas di 8000 firma entrega cu peticion pa aumenta e castigo pa esnan cu comete Hit & Run. Den ultimo añanan por a nota cu e cantidad di Hit & Run ta bin ta aumentando.

Segun e organisadornan di e peticion, no por ta asina cu chauffeurnan irresponsabel ta sigui cobra bida di hendenan inocente y nan mes ta keda casi sin castigo. Chauffeur mester comprende cu un auto ta manera un arma cu por haci hopi daño y hasta causa morto.

Manera Bon Dia Aruba a reporta e luna aki, un di e sucesonan mas tragico y impactante a sucede durante e prome siman di 2026, na momento cu un pareha a perde nan bida den un hit & run diadomingo 4 di januari riba L.G. Smith Boulevard.

E caso aki, den cual e sospechoso C. Fernandes, coriendo den un auto SUV color preto na un velocidad extremadamente halto, a trapa un pareha y core bay sin stop, lagando nan atras, a causa un conmocion enorme. No solamente pa e manera horibel den cual e pareha a perde nan bida mientras nan tabata crusa riba zebread, sino pa e hecho cu e chauffeur, cu segun medionan local tabata core bao influencia, a bandona e sitio sin ni sikiera stop un rato pa mira kico el a causa.

Na e sitio, dokter forensico a constata morto di e pareha: Josely Paulina Vasquez Gonzalez naci riba 09-07-1960 na Republica Dominicana y Carlos David Viales Valerio naci riba 19-10-1971 na Republica Dominicana, prome y di dos morto den trafico pa aña 2026.

E hecho cu e chauffeur a bandona e sitio despues di e accidente a causa indignacion y tristesa adicional.

Riba rednan social, Edwin Willems – yiu di e victima y un di e organisadornan di e iniciativa pa bin cu castigo mas halto pa casonan di Hit & Run – a haci un yamado pa pueblo uni pa busca husticia “no solamente pa mi mama y su casa, sino pa tur victiman y famianan cu a pasa locual nos ta pasando.” Hunto cu su post, el a inclui un cantidad di caso di morto den



trafico, mustrando cu hopi biaha, consumo di alcohol y coremento bao influencia ta involucra, y alabes, cu hopi biaha e castigo cu ta duna na e chauffeur cu tabata core bao influencia ta demasiado abao.

Esaki a cuminsa un conversacion entre usarionan riba un tema cu ta birando un urgencia na nivel nacional y cu mester haya atencion debido. “Tristo cu no tin castigo drechi na Aruba,” S.T. a comenta. “Hit and run ta mescos cu intento di asesinato. Y si e victima fayece e ta conta mescos cu asesinato. Mester baha man pisa riba e casonan aki.” El a haci alabes algun sugerencia di e castigonan cu lo considera adecuado pa e cri-

mennan aki. “Si haya hende ta core bebi, boet nan y kita nan rijbewijs pa minimo 6 luna. Exigi nan test cu nan ta limpi di alcohol/droga prome nan hay’e back. Door di e castigonan ridiculo cu tin aki, hende ta sigui haci y deshaci den trafico.”

Patronchi persistente den trafico

Durante ultimo cinco aña, cifranan di fatalidad den trafico a varia, pero e causanan subyacente tras di accidente mortal a muestra un continuidad notable. Datonan di Ministerio Publico (OM) y reportahenan den medionan local ta punta ripitidamente riba coremento bao influen-



cia y comportamiento di hit & run como problemanan persistente y sin resolve riba camindanan di nos isla.

Durante periodo di cinco aña di 2021 te 2025, Aruba a registra mas di 50 fatalidad den trafico, cu casonan di coremento bao influencia aumentando notablemente entre 2021 y 2023, y comportamiento di hit and run ripitidamente presente den datonan oficial y reportahe di suceso.

Loke ta resalta ta no solamente e cantidad di morto, sino e consistencia di e factornan di riesgo. Coremento bao influencia di alcohol a keda prevalente a pesar di

accionnan di polis, mientras e disponibilidad di e chauffeurnan pa bandona escena di accidente ta punta riba un problema mas profundo di evasion di responsabilidad y disuasion.

Pa legisladornan y agentenan di ley, e ultimo cinco aña ta sugeri cu morto den trafico na Aruba ta resultado di patronchinan di comportamiento cu a proba di ta resistente pa intervencionnan a corto plaso. Pa e motibo aki, comunidad ta exigiendo un cambio urgente den procesamiento, enhuiciamento y castigo di e casonan aki.

Guinea-Bissau ta bisa cu a suspende estudio di vacuna di Merca

(TheGuardian) – Oficialnan di Salud Mericano a insisti cu e ta bay door. Lidernan di salud Africano a bisa cu el a keda cancela. Den centro di e controversia tin e nacion Africano di Guinea-Bissau – un di e paisnan mas pober na mundo, y e lugar proponi pa un estudio Mericano altamente debati tocante vacuna.

E estudio tocante vacuna di hepatitis B, lidera pa investigadornan Danes, a bira un punto clave despues di cambionan mayor na e programa di vacunacion Mericano y a lanta pregunta tocante con pa conduci investigacion eticamente na otro pais.

Diahuebs, Quinhin Nantote, un dokter militar y recién nombra minister di Salud na Guinea-Bissau, a confirma pa periodistanan cu e estudio a keda “cancela of suspendi” pasobra e ciencia no tabata bon revisa. Guinea-Bissau a experimenta un golpi di estado na november, y lidernan top a keda reemplasa recientemente.

Un team di experto den investigacion na e Centro Africano pa Control y Prevencion di Malesa (Africa CDC), riba solicitud di Nantote, ta bay biahá pa Guinea-Bissau pa yuda oficialnan revisa e estudio. Oficialnan di Dinamarca y Merca tambe a keda invita pa revisa e estudio, segun Jean Kaseya, director general di Africa CDC, a bisa na e reunion cu prensa.

E decision pa stop e estudio no ta pa organisacion internacional of pais stranhero determina, Kaseya a bisa. “Ta e soberania di e pais,” el a bisa. “Mi no sa kico ta bay para cu e decision aki, pero mi ta bay sostene e decision cu e minister ta bay haci.”

Oficialnan cu Departamento Mericano di Salud y Servicio Humano (HHS) a cuestiona e credibilidad di Africa CDC, despues cu oficialnan cu e organisacion a confirma cu e estudio a keda cancela.

“Pa ta cla, e estudio ta bay sigui manera planea,” Andrew Nixon, un vocero di HHS, a bisa den un declaracion di aranson. El a bisa cu Africa CDC tabata eherciando un “campana di relacion publico cu meta pa forma percepcion publico en bes di atende e



hechonan científico.”

Un oficial di HHS tambe a yama Africa CDC “un organisacion falso, sin poder purbando di fabrica credibilidad door di ripiti su reclamonan publicamente,” agregando cu e organisacion “no ta un fuente confiable.”

Kaseya a bisa cu el a papia cu oficialnan senior di HHS, kende no tabata na altura di e declaracion, y el a punta na e rol clave di Africa CDC den e respuesta contra brote cu implicacion global. “Ta hopi importante pa financia investigacion cu Africanonan realmente kier,” segun Abdulhammad Babatunde, un dokter medico y investigador di salud global na Nigeria. “Africanonan kier resolve problemanan di Africa, no satisface e curiosidad di e financiadornan.”

E investigadornan lo a duna vacuna di hepatitis B na 7mil baby na momento di nan nacemento, y no duna e vacuna na otro 7 mil te cu nan cumpli seis siman di edad, pa asina studia e efectonan general di salud di duna e vacuna

hunto cu otro hangua. Casi un di cada cinco adulto, y como 11 por ciento di mucha na Guinea-Bissau tin hepatitis B – poniendo nan den riesgo halto di malesa severo y morto.

“Esaki no ta aceptable,” Babatunde a bisa di diseño di e estudio. “Pa preveni cosnan manera e estudio Tuskegee y otronan, e grupo di control mester ricibi e standard di cuido, y e grupo di intervencion lo mester ricibi [potencialmente] miho cuido.”

Organisacion Mundial di Salud ta recomenda duna vacuna di hepatitis B na tur baby recién naci dentro di 24 ora di nacemento. Baby na Guinea-Bissau actualmente ta ricibi e hangua na 6 siman di edad, pero e dosis ta bay keda lansa pa tur recién naci na 2028 pa asina cera e gap den standard di cuido. “E motibo actual pakico e vacuna no ta logrando cobertura na Guinea-Bissau ta pasobra no tin fondo, y e fondo mester purba di promove e vacuna, no usa mucha como djaca di laboratorio,” Babatunde a bisa.

Oficialnan den un estructura di poder desbalansa por keda intimidada, el a bisa. “E por wel di ta un decision dificil pa oficialnan na Guinea-Bissau, dependiendo di kico nan tin di perde si nan restringi e estudio. Na e momento aki, ta [ora] pa otro estadonan Africano bin sostene Guinea-Bissau, pa mantene nan soberania y protege e muchanan di Guinea-Bissau.”

Na momento di dicidi si un version revisa di e estudio ta bay dilanti, “e voz mas importante” tabata esun di ministerio di Salud di Guinea-Bissau, cual ta responsable pa protege salud di tur Guineano, segun Gavin Yamey, profesor di salud global na Duke Global Health Institute. “Pues scucha di oficialnan di e ministerio awe ta sumamente importante.”

E confusion na Guinea-Bissau ta bin back na e manera con a duna luz berde na e estudio, segun Nantote, kende a papia den Portugues mediante un traductor.

Un version inicial di e estu-

dio a keda aproba pa e seis persona di comite di etica di Guinea-Bissau, e Comité Nacional de Ética em Pesquisa em Saúde (CNEPS), dia 5 di november, segun e investigadornan Danes. E investigadornan a haci update desde esey, cu no a keda aproba pa e comite.

CNEPS inicialmente a aproba e estudio, segun un individuo cu a identifica su mes como e director interino di CNEPS. E estudio no a menciona cu baby lo keda sin vacuna, el a bisa – pero e preocupacion etico ta cu no lo duna e vacuna pa algun baby recién naci, na momento cu e ta mas necesario. No a haci ningun otro cambio na e diseño di e estudio pasobra el a keda “suspendi” pa ministerio di Salud di e pais, el a bisa.

“Nos ta pensa cu nan no a cumpli y nan no a atende e asunto aki adecuadamente,” Nantote a bisa di e comite di etica.

E investigadornan Danes no a parce di busca aprobacion di huntanan di etica na Dinamarca of Merca, maske e declaracion di Helsinki ta rekeri aprobacion di comitenan di etica pa ambos e pais financiador y e pais anfitrión.

HHS a bisa den un declaracion na The Guardian despues di publicacion diabierna cu e estudio ta pausa, pero no a responde na pregunta di e medio tocante preocupacion etico y su caracterisacion di Africa CDC. E investigadornan no a responde na pregunta tocante cancelacion di e estudio of tocante nan investigacion. HHS, e investigadornan, y Universidad di Sur di Dinamarca no a responde na pregunta tocante si a consulta comitenan di etica Mericano of Danes.

Nantote y Kaseya ambos a resalta e retonan di salud na Guinea-Bissau. Menos cu un cuarta parti di e pais tin acceso na servicionan basico di salud manera awa y sanitacion. Pobreza y inseguridad di cuminda ta persistente.

Cu acceso limita na cuido di salud, mortalidad maternal ta halto, y malaria ta e causa lider di morto.

“Autoridadnan di Guinea-Bissau sa esey,” Kaseya a bisa. “Nan ta haciendo nan best pa atende esey.”

Keda alerta pa estafa riba rednan social!

No click riba aviso paga (sponsored ad) cu ta usando imagen di Aruba Today.
Bishita solamente e pagina oficial di Facebook, Aruba Today News, of e website
www.arubatoday.com.

Si bo haya algun problema, nos t'ey pa yuda: bondia.aruba@gmail.com



Van Hijum ta renuncia como lider di NSC despues di derota electoral *Partido ta pausa eleccion di liderazgo*

(NLTimes)—Ex lider di NSC Eddy van Hijum a renuncia di liderazgo maximo di e partido diasabra durante congreso di NSC na Amersfoort, lagando e partido temporalmente sin un lider politico. E decision ta sigui e mal resultado di NSC den e ultimo eleccion nacional, unda e partido no a logra gana ningun asiento den Tweede Kamer.

“Un lider interino lo manda e señal equivoca y lo causa atrobe dilemanan innecesario,” presidente di NSC Reinout van Malenstein a bisa durante e reunion general di miembronan. E partido a tuma e “decision delibera” pa no nombra un sucesor inmediatamente. NSC tin plan pa scoge un lider politico mas despues, pero prome kier reevalua su direccion.

Van Hijum, ken tabata e candidato principal di NSC den



eleccion, a splica su decision riba escenario. “Mi tambe mester busca un trabao nobo. Y mi no por keda totalmente comprometi na Den Haag,” el a bisa.

NSC ta spera pa bolbe Tweede Kamer cu dos te tres asiento den e proximo eleccion nacional. Miembro di Parlamento

Europeo Dirk Gotink lo sirbi como cara publico di e partido turesten, Van Malenstein a nota. Despues di e perdida di 20 asiento na 2023, Gotink ta e unico representante eligi cu e partido a keda cune.

Van Malenstein a bisa cu e partido realisticamente no ta anticipa pa bolbe parlamento

prome cu e eleccion di 2030, pero e no a descarta un retorno mas tempran. Te e ora ey, NSC tin plan pa mantene influencia pafo di parlamento door di saca na luz temanan importante y organisa simposionan riba varios topico pa hala atencion publico.

Segun reportahenan, e partido

a pasa e ultimo lunanan recolectando opinion di miembronan pa desaroya un strategia pa gana asiento den futuro. Co-fundador y figura principal di partido Pieter Omtzigt ta involucra den formacion di e plannan, cual NSC ta anticipa di finalisa pa november.

Como un prome paso, NSC lo participa den e eleccion municipal cu ta bin na Amersfoort, Apeldoorn, Den Haag, Eindhoven y Zoetermeer. Van Malenstein a enfatisa cu e meta no ta pa gana hopi asiento, sino establece e partido como uno cerca di ciudadano y traha ramanan local activo.

“Nos a cuminsa e movimiento aki pa un bon motibo, pa restaura confianza den politica. Nos tin miles di miembro, y nos ta representa den Parlamento Europeo. E candela ey ainda ta kimando,” Van Hijum a bisa un dia despues di eleccion.

Ehercicio anual di Barracuda Warrior na Corsou

E ehercicio militar anual Barracuda Warrior ta andando atrobe. For di 26 di januari te cu 6 di februari, varios unidad militar for di Caribe lo converti na Corsou. Meta di e ehercicio ta pa fortifica e cooperacion entre e varios unidadnan, cu tipicamente ta staciona riba diferente isla. Un total di mas cu 180 militar lo participa na e ehercicio aki.

Actividadnan durante Barracuda Warrior ta tuma luga na Wacao, tereno di Ehercicio di

Defensa, Koraal Tabak, e anterior hospital na Otrobanda, y den e area di Playa Kanoa. E entrenamentonan ta consisti di varios componente, manera operacionnan riba lama y riba tera, operacionnan den areanan construi, ehercicionan di artilleria, y simulacionnan di atakenan plania y no plania. E soldanan ta trein tanto den dia como anochi.

Mas cu 180 solda ta participante den Ehercicio Barracuda Warrior. Nan ta representa e Escuadron di Marina di Aruba, destacamento di Cu-




erpo di Marina Sint Maarten, Peloton di Boto di Corsou, unidadnan di Ehercito, y militarnan di Corsou. Soldanan di Corsou mas y mas ta participante den ehercicionan

militar grandi como parti di e profesionalisacion continuo di e militarnan Caribense.

Barracuda Warrior ta keda un ehercicio militar anual cru-

cial pa mehora e preparacion y conectividad entre unidadnan den region Caribe. Esaki ta contribui na mantene paz y seguridad den region Caribe.



Centenares di hende reuni na Amsterdam pa conmemora 81 año desde liberacion di Auschwitz

(NLtimes) - Centenares di hende a reuni diadomingo na Amsterdam pa conmemora 81 año desde liberacion di Auschwitz, e campo mas grandi di exterminacion nazi durante e Segunda Guera Mundial. E conmemoracion anual di Holocausto a inclui un marcha silencioso door di e Spiegelmonument Nooit Meer Auschwitz di Jan Wolkers na Wertheimpark, caminda autoridadnan y ciudadano a reflexiona riba tanto menasa historico como pres-

encia di odio.

Entre e participante tabata e prome minister demisionario Schoof, e presidentenan di Eerste Kamer y Tweede Kamer, Thom van Campen y Mei Li Vos, y alcalde di Amsterdam, Femke Halsema.

Alcalde Halsema a enfoca su palabra riba e sufrimento continuo di mucha riba mundo, señalando cu mas cu 80 año despues di guerra, “mucha ainda ta ser mata, secuestra y usa den guerra y conflictonan den

cual nan no tin parti ni rol”.

Hende a menciona diferente motibo pa ta presente. Un muher a bisa: “Nos ta aki pa sigura cu e Sinti y Roma no ser lubida. Nos no tin tumba di nos famia pa bishita”, segun NOS ta reporta. Un otro a declara: “Bo ta mira populismo y ultra-derechismo tur caminda, den tur pais di Europa y tambe na Merca. E conmemoracion di Auschwitz tambe ta un manera pa keda vigilante”.

Mientras cu algun a expresa



preocupacion riba estado di sociedad, otro a manifesta speransa. Un persona a bisa:

“Sperando cu nos tur por muestra cu ainda tin mas hende bon cu hende cu mal intencion”.

Cuater persona aresta na Zeeland pa horta NFT cu balor di €1,4 milyon

(NLtimes) - Cuater persona a ser aresta den relacion cu e hortamento di certificadonan digital di propiedad, conoci como NFT, cu un balor total di aproximadamente €1,4 milyon, segun NOS a reporta. E sospechosonan tambe ta bao di investigacion pa labamento di placa.

Polis di Zeeland a cuminsa un investigacion despues cu nan a ricibi un tip riba e robo di e activonan digital. Autoridadnan a identifica e sospechosonan como dos homber y un muher di Axel, y un muher di Terneuzen. Tur cuater sospechoso a ser libera despues di interrogatorio, aunke e investigacion ta sigui den curso.



Mas tempran den siman, polis a redada un cas na Axel. Du-

rante e accion, investigadonan a confisca medio di almace-

namento digital, placa cash y tres vehiculo. E propiedad

mes tambe a ser poni bao di embargo.

NFT, of ‘non-fungible tokens’, ta certificadonan digital unico cu ta liga na arte, musica of video, y cu ta sirbi como prueba di propietario. E certificadonan aki por ser horta por medio di hacking of phishing.

E popularidad di NFT a crece hopi algun año pasa, cu milyon di obra digital comercialisa durante 2021, hopi biaha pa sumanan enorme. Un empresario Malayo a cumpra e prome tweet cu a ser publica, di 21 di maart 2006, door di fundador di Twitter Jack Dorsey, pa casi €2,5 milyon, marcando un di e prome transaccionnan di NFT di perfil halto.

Homber Hulandes aresta na Bucarest cu 12 kilo di e yamado “zombie drug”

(NLtimes) - Autoridadnan Rumano a informa cu un homber Hulandes di 50 año a ser aresta na Bucarest despues cu polis a sorprend’e mientras e tabata transportando aproximadamente 12 kilo di un substancia psico-

activo prohibi, conoci den mercado ilegal como e “zombie drug”. Segun investigadornan, e droga a ser manda for di Hulanda pa Rumania por medio di un compania di transporte internacional, y e sospechoso a purba huy

sin exito despues cu autoridatnan a intercept’e.

E Direccion Rumano pa Investigacion di Crimen Organisa y Terrorismo (DIICOT) a declara cu fiscalnan a duna orden pa e detencion di e homber riba 23 di januari como parti di un investigacion riba operacionnan ilegal cu ta involucra substancianan cu por produci efecto psicoactivo.

Segun investigadornan, e sospechoso a obtene aproximadamente 12 kilo di e substancia psicoactivo N-ethylnorpentadrone na Hulanda mas tempran den luna. Autoridadnan a indica cu e homber tabatin intencion di distribui e substancia comercialmente na Rumania.

Segun fiscalia, un compania di envio internacional a hiba e droga pa Rumania. Autori-

dadnan a detene e sospechoso mientras e tabata transportando dos maleta grandi, cual el a recoge na oficina local di e compania na Bucarest.

E tabata biaha den un auto di huur cu tabata operando como taxi na momento di e aresto. Polis a encontra varios saco cu e substancia psicoactivo den e maletanan.

Autoridadnan a informa cu e substancia ta conoci den mercado ilegal como e “zombie drug” y ta un di e substancianan psicoactivo cu ta ser usa frecuentemente pa consumidornan hoben. For di e cantidad confisca, investigadornan ta calcula cu por a produci por lo menos 120.000 dosis individual.

Fiscalnan a declara cu na Rumania e droga normalmente ta ser dividi den paketenan chikito cu no ta pasa 0,10

gram y usualmente ta ser bendi pa mas of menos 10 lei pa pakete.

Autoridadnan a adverti cu e prijs abao ta haci e droga facilmente accesibel pa usuarionan dependiente, kende nan a describi como particularmente vulnerable. Fiscalnan a agrega cu uso di e substancia ta mantene usuarionan den un estado di dependencia fisico y psicologico, y por trece daño serio na salud y incluso morto.

Diabierna, fiscalnan di DIICOT a pidi un hues na Tribunal di Bucarest pa emiti orden pa detencion preventivo di e sospechoso pa 30 dia. DIICOT a declara cu tur sospechoso tin derecho na garantia procesal cu ta denCodigo di Procedura Penal di Rumania, incluyendo e presuncion di inocencia.



Ecuador ta acorda reunion cu Colombia pa resolve disputa di tarifa

(AFP) – Den weekend, Ecuador a bay di acuerdo pa un reunion cu bisña Colombia pa purba di resolve un guera di represalia cu tarifa inicia pa un desacuerdo tocante con pa atende traficacion di droga na nan frontera comun.

Siman pasa, e paisnan a impone tarifa reciproco di 30 porciento riba importacion di otro, y Colombia a anuncia un suspension di benta di coriente na su bisña.

Ecuador di su banda a menasa un impuesto riba tur petroleo Colombiano biahando door di su tuberia OCP propiedad di estado.

E disputa tabata inicia pa Quito, acusando Colombia – e productor di cocaina mas grandi na mundo – di keda atras den e lucha contra cartelnan di droga culpa pa un aumento skerpi di crimen violento na Ecuador, cu antes tabata hopi pacifico.

Bogota ta insisti cu e responsabilidad ta uno comparti, y a propone un reunion na e frontera ayera pa purba di resolve e disputa.

Diabierna, Ecuador a bay di acuerdo, pero minister di Exterior, Gabriela Sommerfeld a propone un fecha alternativo pa e siman aki.

Presidente di Ecuador, Dan-



iel Noboa ta un aliado di su contraparti Mericano, Donald Trump, kende tambe a pone e lucha contra droga como prioridad y similarmente a usa tarifa den busca su metanan.



Expertonan cu ken AFP a tuma contacto a bisa cu Ecuador por keda den desbentaha den un enfrentamento cu Colombia.

Colombia ripitidamente a sali na ayudo di su bisña mien-

tras Ecuador a sufri interrupcion prolonga di coriente durante segura na 2024 y 2025.

Ecuador, un pais di 17 milyon, ta depende riba generacion hidrolico pa 70 porciento di su coriente. Pero ta consumi mas energia di loke ta produci, y Colombia ta cubri como mita di e deficit.

Ecuador ta insisti cu e pais no tin mester di coriente di Colombia.

Expertonan di e sector ta bisa cu e pais tin autonomia pa 45 dia bao condicionnan normal di clima, maske e riesgo di segura ta halto den berano di hemisferio sur.

EU ta indica cu ta cla pa implementa acuerdo comercial cu Mercosur a pesar di voto parlamentario pa pospone

(AP) — Union Europeo ta dispuesto pa implementa un acuerdo amplio di comercio liber cu e grupo di pais Sur Americano, Mercosur, a base provisional, segun hefe di comision ehecutivo di EU a bisa den weekend, a pesar di un voto di parlamento di EU pa pospone ratificacion pa revision legal.

EU lo ta cla pa actua asina cu al menos un pais Mercosur ratifica, segun presidente di Comision Europeo, Ursula von der Leyen a bisa na conclusion di un cumbre di lidernan di EU na Bruselas



unda varios lider nacional a trece e asunto dilanti.

“Tin un interes cla pa nos

sigura cu e beneficianan di e acuerdo aki aplica lo mas pronto posible,” Von der Leyen a bisa na un conferen-

cia di prensa. “En corto, nos ta bay ta cla ora nan ta cla.” El a bisa cu ainda no a tuma un decision formal pa implementa e acuerdo ainda.

Na e mesun conferencia di prensa, Antonio Costa, cabesante di consoho di gobierno miembro di EU, a bisa cu e comision ehecutivo tin autoridad pa bay dilanti cu implementacion interino.

Un decision pa haci esey probablemente lo provoca critica di oponentenan di e acuerdo, lidera pa Francia. Diaranson ultimo, e parlamento tabatin un voto preta

pa referi e acuerdo na Corte Europeo di Husticia pa revision legal, posponiendo ratificacion ya cu parlamento no por vota tocante ratificacion te cu corte duna su veredicto. Esey por dura lunas.

E acuerdo ta central pa e plan di Bruselas pa forma relacion comercial pafo di un dependencia historico riba Merca den bista di e antagonismo y agresion durante e di dos termino di presidente Mericano, Donald Trump. Nan a cera acuerdo for di Hapon te Mexico, y ta spera di firma un acuerdo similar cu India e luna aki.

Venezuela ta libera al menos 80 prisionero politico, segun NGO

(AFP) – Al menos 80 prisionero politico a keda libera diadomingo na Venezuela, unda detencionnan ta siendo libera poco poco bao presion di merca, segun organizacion no-gubernamental Foro Penal a bisa.

Director di e grupo, Alfredo Romero a bisa riba X cu e NGO tabata verificando e identidad di esnan libera na prisonnan na henter e nacion, agregando cu ta “probable cu mas liberacion ta bay tuma lugar.”

Abogado di Foro Penal, Gonzalo Himiob a bisa cu e liberacionnan a tuma lugar den oranan trempan. “E cifra ainda no ta definitivo y por

aumenta mientras nos ta procede cu verificacion,” el a bisa riba X.

Lider interino di gobierno di Venezuela, Delcy Rodriguez, kende a asumi poder na momento cu Nicolas Maduro a keda captura pa forsan special Mericano e luna aki, a priminti di libera un “cantidad grandi” di e centenares di oponente di Maduro cu ta decayendo den prison.

Autoridadnan na Caracas a bisa cu nan a libera 262 detenido desde december, pero Foro Penal a registra apenas mita di e liberacionan den e periodo di tempo en cuestion.

Oposicion Venezolano y gru-



ponan di derecho humano a critica e desaroyo slow di e

proceso. Sernan keri di e detencionnan ta campando pafo

di e prisonnan wardando pa nan liberacion.

Gobierno di Cuba ta reusa regulacion di salario bieu y ta presenta esaki como medida nobo

(CiberCuba) - Gobierno di Cuba a presenta un bi-aha mas un regulacion di salario como un “decision nobo,” aunke el a ser aproba y publica lunanan pasa. Ta trata di e Acuerdo 10199/2025 di Consejo di Minister, un reglamento cu a keda formalisa caba na augustus 2025, pero cu a pasa practicamente sin ser nota e tempo ey. Awor, na comienso di 2026, autoridatnan a rebiba esaki y a plama esaki pa medio di medionan oficial como si fuera e ta un iniciativa recien pa mehora e entrada di trahadornan estatal.



E maniobra di comunicacion aki ta tuma luga den un contexto di deterioro economico severo, marca pa inflacion, scarsedad di productonan basico, y e abandono constante di trabounan den e sector estatal. Dilanti di e inhabilidad pa implementa aumentonan di salario real y sostene, e regimen ta parece di ta recurri na reusa regulacionnan existente pa transmiti e imagen cu accionnan concreto ta ser tuma pa beneficia trahadornan.

Acuerdo 10199/2025 ta permiti entidadnan estatal pa redistribui fondonan di salario no usa—por chempel, esnan genera pa posicionnan bashi, vakantie sin pago, of ausencia prolonga—den forma di pago of incentivonan adicional pa empleadonan cu ta keda ac-

tivo. E pagonan aki por ser considera como salario pa tur proposito legal, pero nan no ta constitui un aumento fiho of permanente den pago base.

Den practica, esaki ta nifica cu no ta crea financiamento nobo, ni ta aumenta e presupuesto di salario di estado. Institucionnan ta simplemente autorisa pa reparti placa cu tabata aloca caba pero cu no a ser usa. Cada entidad mester establece su propio regulacionnan interno, cu participacion di sindicato, pa defini e criterionan di evaluacion, e sumanan cu mester paga, y e frecuencia di e incentivonan aki.

E enfoke renoba di medionan di comunicacion riba e regulacion aki a ser interpreta pa analista y criticonan como un ehercicio den propaganda

politico, en bes di un contesta efectivo na e crisis di salario. Door di presenta un medida bieu como si fuera e ta nobo, gobierno ta busca pa proyecta un imagen di maneho proactivo, aunke e impacto real riba poder di compra di e trahadornan ta minimo.

Un di e limitacionnan principal di e acuerdo ta cu e incentivonan ta depende di e existencia di spaarmento di salario, algo cu no ta uniforme den tur instancia. Na hopi lugar di trabou, specialmente esnan cu personal completo of recursonan hopi chikito, simplemente no tin fondo disponibel pa distribui. Esaki ta crea desigualdadnan entre entidadnan y ta laga hopi trahador sin ningun beneficio adicional.

Ademas, e acuerdo ta exclui

explicitamente sectornan clave manera salubridad y educacion. Di acuerdo cu e texto oficial, dokter, enfermero y maestronan no por beneficia di e incentivonan aki pasobra nan ta ricibi otro pagonan asocia caba cu “esfuerzo adicional” of “sobrecarga di enseñansa.” E exclusion aki a genera critica fuerte, ya cu e profesionalnan aki ta entre esnan mas afecta pa salarionan abou y e perdida di poder di compra ultimo añanan.

A pesar di e retorica oficial cu ta presenta e sectornan aki como trahadornan “prioritario”, realidad ta cu e entrada real di dokter y docentenan ta keda insuficiente pa cubri necesidadnan basico. Inflacion a reduci drasticamente e balor di salarionan di estado, cu den hopi caso apenas ta cubri

un parti chikito di e gasto di e macutu di cuminda basico informal.

E problema profundo ta structural. E salarionan di estado Cubano ta sigui cay mucho mas abou cu e costo real di bida, y medidanan parcial, manera bonusnan ocasional of redistribucionnan interno, no ta logra compensa e impacto di e crisis economico. En bes di un reforma salarial integral, gobierno ta opta pa solucionnan limita cu no ta cambia e condicionnan general di e mercado laboral.

E reaparicion di Acuerdo 10199/2025 como un supuesto novedad tambe ta refleha e falta di alternativanan economico viabel di Estado. Sin recursonan pa aumenta salario of reformanan profundo pa impulsa productividad, e strategia ta enfoca riba maneha discurso publico en bes di implementa cambionan substancial.

Pa conclui, e regulacion presenta como un logro nobo di gobierno ta, en realidad, un regulacion bieu cu efectonan hopi limita. E no ta introduci placa nobo, no ta beneficia tur trahador, y ta exclui sectornan esencial. Pa hopi Cubano, e reciclahe di medidanan aki ta confirma e buraco entre e narrativa oficial y realidad diario, marca pa salarionan insuficiente, inflacion persistente y malcontento social creciente.

Trinidad y Tobago: Prome minister a bisa cu no tin mas placa pa corporacionnan

(TrinidadExpress) - “Ni un cen mas pa corporacionnan regional; \$2,1 biyon ta mas cu suficiente.” Asina prome minister Kamla Persad-Bissessar a bisa den su declaracion como contesta riba kehonan di varios corporacion regional controla pa PNM, cu a bisa cu reduccionnan di presupuesto a conduci na interrupcionnan den servicio esencial.

Alcalde di Port of Spain Chinua Alleyne a adverti cu un reduccion di 40% den alocacionnan por afecta preparacionnan pa Carnaval 2026 den e capital negativamente.

Alleyne y otro oficialnan di corporacionnan dirigi pa PNM a muestra riba recogemento di sushi como e servicio mas afecta.

Sinembargo, den un publicacion riba Facebook, Persad-Bissessar a argumenta cu e nivelnan di financiamento tabata adecua, y a pone responsabili-

dad pa fayonan di servicio riba maneho y practicanan di forsa laboral dentro di e corporacionnan.

El a bisa cu e pagadornan di belasting tabata financia 13.406 empleado di gobierno local na un costo di \$2.1 biyon anualmente, mientras cu productividad tabata keda inconsistente.

“Corporacionnan di PNM mester stop di yora, pasobra nan no ta bay haya ni un cen mas cu e casi un biyon dollar cu nan ta ricibi caba pa e aña fiscal aki. En bes di esey nan mester cuminsa gasta placa di e pagadornan di belasting riba servicio na ciudadanonan y no riba fiesta, rom, keha riba caminda y paga pa proyectonan fantasma,” el a bisa.

Na 2026, siete corporacion di PNM lo ricibi un total di 987,29 miyon dollar, 181,83 miyon dollar mas cu e 805,46 miyon dollar cu e siete corporacionnan di UNC lo ricibi, el a declara.



Actualmente tin un total di 13.406 persona emplea den tur e corporacionnan regional. E siete corpora-

cionnan di PNM tin 8.220 empleado, 3.034 mas cu e 5.186 empleadonan den e siete corporacionnan di UNC, el a indica.

72 Alegria y Fantasia

Eleccion di princesita Noord cu hopi ambiente y alegria



Diasabra anochi den Centro di Bario Noord a tuma lugar eleccion y coronacion di Princesita Noord y Baby Noord 2026. Un anochi yen di ambiente di carnaval, fantasia y alegria. Dos candidata a competi pa e corona di Baby Noord y cuater candidata a competi pa e titulo di Princesita Noord 2026.

Den e categoria Baby Noord,

Bellamy Pirona a bay cu e titulo di Baby Ambiente y Givienny Danies a bay cu e titulo di Baby Sonrisa.

Den e categoria Princesita Noord, Mackenzie Robert a keda como tercer finalista, Khloe Orman a keda como segunda finalista, Ralynn Alvarado a keda elegi como primera finalista y Claire Maduro a ser corona como Princesita Noord 2026.



Island Asia Store
Av. Milio Croes 122
Nos tin tur cos esencial pa disfruta di Aruba su **CARNAVAL 72** sano y den style!
Tel. 583-8888
Biba nos Carnaval!



The casino at St. Regis Aruba ta partner cu Aruba Caiso & Soca Monarch 2026

Ricibi riba cada ticket di entrada 15 \$ slot credit

Despues di un "Meet The Press" exitoso unda e cas di celebracion tabata anfitrión di tur prensa hunto cu tur lider di banda, The Casino at St. Regis hunto cu Caiso & Soca Monarch, ta ofrece tur persona cu cumpra un ticket di entrada pa e anochi final 31 di Januari 2026 \$15 slot credit.

Corda bo carchi di entrada tin un balor di \$15, - slot credit, e campaña aki ta valido te cu 16 di Februari 2026 cu ta e temporada di Aruba su celebracion cultural di mas grandi "Carnaval".



Con bo ta ricibi bo \$15 slot credit?

Bishita nos Casino VIP Desk bira un miembro, (sino ta un miembro ainda) ricibi \$15, y hunga y gana premionan na The Casino at St. Regis Aruba.

Aruba tin hopi musiconan talentoso, nos di The Casino at St. Regis Aruba ta desea cada banda cantante, musico y pueblo en general un festival cu yen di goso y ambiente.

Pa mas informacion, bishita nos Casino VIP Desk of yama na telefon: 281-2374 Nos orarionan ta di dialuna pa diabierna di 2:00 pm pa 2:30 am y diasabra y diadomingo di 7:30 am pa 2:30 am.

Nos ta warda bo!



CUMPR AWO
Afl. 269
Philips Party
Speaker Bluetooth
USB karaoke
double mic input

electro ★
Avenida Milio Croes 41 • T: (+297) 280-0222

Aruba ta celebra Dia di Betico cu acto protocolar na Plaza Libertador Betico Croes



Diadomingo dia 25 di januari 2025 a tuma luga e Acto Protocolar cuminsando 8:30 di mainta. E programa tabata contene varios discurso y presentacion, tur celebrando nos libertador Betico Croes y nos identidad Arubano en general.

E programa protocolar a cuminsa cu e yegada di mandatarionan, incluyendo parlamentarionan y Gobernador di Aruba, Su Excelencia Al-

fonso Boekhoudt acompaña pa su esposa. Hunto cu e mandatarionan tambe tabatin famia y demas invitado reflexiona y recorda e trayectoria di Sr. Betico Croes d.f.m.

Den un comunicado publica algun dia prome, gobierno a enfatisa cu e celebracion e aña aki ta carga mas significacion, como cu e ta pasando tambe den contexto di 40 aña di Status Aparte, pa cual Betico Croes a dedica su bida pa logra.

E acto a cuminsa cu e himno di Aruba toca pa Kriss Kross and Friends, sigui pa un oracion duna pa Pastor Jairo Maduro di misa Catolico Santa Cruz.

Tambe tabatin un ofrenda floral unda caba mandatario a haya oportunidad pa pone krans na estatua di Betico. Despues a sigui algun poema di Basha foundation, como tambe presentacionnan di cancion y baile, y un discurso final di prome minister Mike Eman. A clausura e ceremonia protocolar cu e himno di Aruba atrobe, e biaha instrumental.

Pa anochi, pueblo por a participa den e manifestacion cultural riba e plaza cuminsando for di 7or. Manera ta custumber, e manifestacion a cuminsa cu presentacionnan folklorico, unda a mira varios baile y cancionnan cubriendo



diferente genero, incluyendo CCDN a prepara un tremendo repertorio caminda lo combina musica, obra y arte tambu, wals, mazurka, danza y tumba. Sr. John F. Montoya a relata e bida profesional di Betico den un bunita obra teatral.

Arubaanse Muziek School (AMS) tambe tabata presente cu un potpourri di cahanan di orgel. Tambe a honra dos baluarte legendario, esta Sr. Robert Jeandor d.f.m. y Sr. Casin Giel.

Banda di esey, pueblo por a disfruta tambe di varios tent di bendedor, unda por a haya cuminda crioyo, obranan artesanal, regalo y snacknan



Arubano.

E anochi aki tabata un recordatorio di e importancia di Aruba su libertad durante cual a celebra nos libertador y identidad unico en grande! Masha pabien Aruba!



Land Sea Air Cargo & Trade
Palo di Boonchistraat 14 | Tel. 582-7215

26 JAN
DIA INTERNACIONAL DI ADUANA

Honrando e dedicacion di Cuerpo di Aduana cu ta garantisa comercio sin problema, fronteranan sigur y conectividad global.

Pabien!

Amber Heard: Huicio cu Depp a kita mi habilidad di conta mi storia

(AFP) - Amber Heard a bisa cu e a sinti su voz silenciosa desde cu e huicio contra Johnny Depp a tuma luga, lamentando e perdida di su storia den un documental.

E actriz ta aparece den un documental nobo "Silenced" cu a premier na Sundance Film Festival diasabra, y e ta reflexiona tocante su bataya legal contra su ex casa - incluyendo e impacto cu esaki a tin riba conta su berdad.

Heard a bisa "mi no tabata comprende con cos por bira

asina mas pio pa mi como un hende muhe, usando mi bos. Mi a perde mi habilidad di papia. Mi no ta aki pa conta mi storia. Mi no kier conta mi toria, de hecho, mi no kier usa mi bos mas. Esey ta e problema."

Manera ta conoci, Depp a entrega un demanda di difamacion contra Heard despues cu Heard a acusa Depp di agredi su persona fisicamente den un 'op-ed' publica den 2018 pa The Washington Post. Na final un hurado a tuma parti pa Depp y a otorga millones di dollar den daño,

mientras cu Hurado a tuma parti pa Heard den su contra demanda.

Heard a sali for di bista publico den añanan reciente, mudando pa Spaña despues di e veredicto y dunando luz na morochonan aña pasa.

Mientras cu Heard su imagen no a recupera completamente despues di e huicio, Depp si a recupera y cada biha ta ricibiendo proyectonan mas grandi, recientemente dirigiendo un pelicula cu Al Pacino.



Mark Tully di BBC ta fayece cu 90 aña



(AFP) - Corresponsal veterano di BBC, Mark Tully, conoci pa miyones como e emisora su "bos di India" pa cubri momentonan clave den e subcontinente, a fayece diadomingo cu 90 aña.

Naci na India den 1935 bao mando Britanico, el a haci e pais su cas y su carera, biran-

do e miho corresponsal di exterior miho conoci den e pais.

Prome minister di India, Narendra Modi, a bisa den un declaracion cu e tabata "tristo cu e perdida di Sr. Mark Tully, un voz den periodismo."

Tully, ken a fayece n New Delhi, a cubri e guerra di liberacion di Bangladesh y e de-

molicion di e moskee Babri na Uttar Pradesh den 1971 y 1992 respectivamente.

"Su conexion cu India y e hendenan di nos nacion tabata refleha den su trabao," Modi a agrega.

BBC News su hefe interino Jonathan Munro a bisa cu "Sr. Mark a habri India pa resto di mundo via su reportahe, treciendo e alegria y diversidad di e pais na audien- cianan na Reino Uni y rond di mundo."

Tully a studia teologia na Cambridge University prome cu el a uni un seminario. Sinembargo el a regresa India den 1965, uniendo BBC na New Delhi como administrador di oficina.

Despues di trabao breve na Londres na BBC su Hindi and World Service, el a keda

designa como e emisora publico su corresponsal na New Delhi den 1971.

Tully a keda nombra como hefe di bureau algun aña despues, supervisando cobertura di Sur Asia, incluyendo India, Pakistan, Bangladesh y Sri Lanka - un posicion cu el a tene pa 2 decada.

"Pa generacionnan den nos subcontinente, su bos tabata un sinonimo di noticia," Hardeep Singh Puri, India su minister di petroleo a bisa den un declaracion.

"Tully, naci na Kolkata, tabata reporta tocante algun di e momentonan mas importante y clave den e region su historia," el a agrega.

El a renuncia BBC den 1994 den medio di un reforma dramatico di e organizacion, criticando e director general

di e tempo aki John Birt, denunciando "revolucion" cu ta tumando luga na e corporacion, cuminsando cu un "atake amplio riba BBC su periodismo."

Despues di renuncia, el a sigui traha como un freelancer y skirbi buki.

Tully a ricibi e premio Padma Shri y Padma Bhushan, entre India su honornan civil mas halto, y rarabes duna na stranheronan.

Britania tambe a honra su persona pa su servicionan na emision y reportahe den 2002 - un reconocimiento cu Tully despues a describi como un "honor pa India."

The Times of India a yam'e "un historiado di India."

Museo na Drents ta sufri kwart biyon euro den daño despues di robo

(AFP) - E museo di Drents a sufri aproximadamente 250.000 euro den daño material durante un robo grandi di arte exactamente un aña atras, autoridatnan a bisa.

E robo a tuma luga contra tesoronan arkeologico bao prestamo for di Museo Historico Nacional na Bucharest, Romania, incluyendo e helmet Cotofenesti y 3 armband di oro. Ningun di e obhetonan horta a keda recupera.

E robo a sucede durante madrugada di 24 pa 25 di januari den 2025. 3 hende homber supuestamente a usa un dis-

positivo grandi di klapchi, mas pisa cu un Cobra 6 of 8, pa explota e porta di e museo. Despues nan a kibra varios caha pa bay cu e artefactonan. A pesar di e destruccion di e caha, un otro helm cu balor di 3.2 miyon euro a fracasa.

E daño material total ta inclui areglo na e porta, vloer, muraya y dak, ademas di costonan di limpiesa," un vocero di e museo a bisa.

E provincia Drenthe, propietario di e edificionan di e museo, a parcialmente cubri e daño. "Nos ta expresa nos gratitud mas profundo na e provincia. Nan contribucion financiero ta yuda restaura e

daño y sostene e preservacion di largo plaso di Drenthe su herencia cultural," e provincia a bisa.

E museo a keda cera pa henter un siman despues di e robo, e espacio di exhibicion cu ta contene e artefactonan horta no por a ser usa pa un periodo mas largo. Ademas di daño fisico, e museo ta enfrenta gasto pa conseho profesional y ganashi di bishitan- tenan perdi.

E articulonnan horta tabatin un balor di 5,7 miyon euro. E helm Cotofenesti, tabata sigura pa 4.3 miyon euro y e 3 armband di oro hunto tabatin balor di 1.4 miyon euro.



Gobierno Hulandes a ricibi compensacion di e seguro pa e cantidad completo, cu posible reembolso si logra recupera e artefactonan.

3 homber sospechoso ta

keda bao detencion y ta den schedule pa para dilanti corte na Assen e aña aki. Ministerio Publico (OM) te cu awo ta declara cu e sospechosonan aki tabata presente den e museo durante e robo.

Presidente di federacion Senegales di futbol: Maroco a actua di mal manera na AFCON

(AFP) - Abdoulaye Fall, presidente di Federacion di Futbol Senegales (FSF), a critica Maroco diadomingo y Confederacion di Futbol Africano un siman despues di e fin controversial na Africa Cup of Nations.

Senegal a logra victoria contra Maroco 1-0 despues di extra tempo den e final, despues cu algun hungado brevemente a cana bay ora cu e anfitriónnan a keda otorga un penalty final di tempo normal.

Fall a nombra diferente fayó den acomodacion, seguridad y trabao di referee, y a sugeri cu e nacion anfitrión a ricibi trato preferencial. "Ningun pais a opone Maroco e manera cu Senegal a hacie," Fall a bisa den un video publica riba e website Senegales Seneweb.

Fall, papiando den e idioma local Wolof na un ceremonia diasabra, a señala cu Marocano Fouzi Lekjaa ta un di e vice presidente di African Football Confederation (CAF), cual "Maroco ta controla. Ban bisa ber-



dad," el a expresa.

Fall a keha tocante e anuncio laat di e oficialnan di e wega pa e final.

"Nos mester a haya sa ken e referee pa e wega ta dos dia prome. Nos a puntra nan ken e lo ta y nan a bisa nos cu nan no tin informacion te ainda. Tin deadline pa posiblemente desafia un referee pero e tabata e anochi prome cu e wega, 10or di anochi, cu nos a ricibi e notificacion," Fall a comenta.



El a bisa cu CAF a splica cu e tabata kier "proteha e referee pa medio di spaar presion" pero esaki ta nifica cu nos no por a "desafia su posicion mas."

Fall tambe a keha tocante e hotel cu a asigna na e ekipo di Senegal na Rabat pa e final, pasando e rondanan anterior basa na Tangier. "E ekipo Senegales no por keda na e hotel aki den e centro di e ciudad cu hopi zonido y

sin acceso na caminda."

Ademas, ora cu e ekipo a yega Rabat, e hungadonan a haya nan mes sin seguridad. Tambe el a keha cu e Marocanonan "tabata kier obliga nos train na nan base, e ultra-moderno Mohamed VI centre, cual no tin rival na Senegal. Si nos lo a bay aya, nan lo a haya sa tur cos di nos ekipo."

Fall a conta cu despues cu el a menasa cu no hunga den e final, a aumenta seguridad, e ekipo por a train den otro stadion y a haya un hotel nobo pa nan.

Den e wega final, referee Congoles, Jean-Jacques Ndala a descarta un strike di Senegal pa un foul y despues den evaluacion via video, a otorga e pais anfitrión un penalty.

Algun di e hungadornan Senegales a brevemente cana bay mientras nan sostenedornan a purba invadi e veld mientras a pausa wega pa 15 minuut.

Ora cu el a sigui cana, Brahim Diaz no a logra anota e penalty.

Decenas deteni mientras fanaticonan di futbol di Croacia y Serbia ta enfrenta otro na Bosnia



(AFP) - Cerca di 100 persona tabata deteni y por lo menos 18 herida ora cu fanaticonan di club di Croacia Hajduk Split a pleita cu fanaticonan di campeonnan Serbia Red Star Belgrade na un aeropuerto na Bosnia, polis a bisa diadomingo.

E violencia a cuminsa fin di diasabra ora cu fanaticonan di Croacia su Hajduk Split aparentemente a haci un emboscada na sostenedornan di Red Star mientras nan tabata regresa for di un wega di Eu-

ropa League na Suecia, media local a reporta.

E pelea a surgi pafó di aeropuerto Tuzla, alrededor di 80 kilometer noordoost di Sarajevo, polis a bisa.

Por lo menos 18 persona a keda herida den e accidente, incluyendo un cu te ainda ta den cuido intensivo na Tuzla hospital.

Polis a detene 93 persona, di ken 14 a keda den custodia y lo keda entrega na fiscal segun polis a bisa. Nan ta inclui

11 persona di Croacia y 3 nacional di Bosnia.

Media local a reporta cu e pelea a sucede mientras fanaticonan di Red Star, conoci como Delije, a regresa for di Suecia unda nan ekipo a hunga contra Malmo diahuebs.

Hajduk Split su sostenedornan, conoci como Torcida, tabata wardando pa nan na aeropuerto.

Ambos Croacia y Serbia tin hopi tempo ta lidia cu delincuencia, cu Torcida y Delije su fanaticonan entre e ofensornan mas conoci.

E bisiñanan Balcanico tin relacionnan frió desde e guerra den 1990 durante cual Serbia a sostene Serbionan rebelde cu ta opone Croacia su independencia.

E historia aki ta influencia comportamiento di fanaticonan.

Weganan entre clubnan di e dos ex-republica Yugoslavico ta considera eventonan di riesgo halto y antagonismo entre fanaticonan di futbol ta intenso.

Sumo Wrestler di Ucrania ta gana di dos titulo consecutivo



(AFP) - Sumo wrestler Ucrainiano Danylo Yavhusishyn a gana su di dos torneo consecutivo diadomingo, subiendo su exito meteorico den e deporte Hapones na nivelnan nobo.

E hoben di 21 aña, ken a huy di e guerra na Ucrania 3 aña pasa, a triunfa na New Year Grand Sumo Tournament na Tokyo pa e di dos titulo di su carera.

Yavhusishyn, ken ta conoci pa su nomber den ring Aonishiki, a bira e prome wrestler di Ucrania cu a gana un competencia unda el a sali den prome luga na Kyushu Grand Sumo Tournament den november.

Esaki a logra un promocion na Sumo su di dos rango mas halto Ozeki den tempo record, haciendo su debut den juli di 2023.

Su di dos titulo ta hib'e un paso mas cerca di promocion na e rango mas halto, Yokozuna, un logro cu ningun wrestler naci na Europa a yega di logra.

Yavhusishyn ta solamente e di 4 Europeo cu a logra bira un Ozeki, despues di wrestler di Estonia, Bulgaria y Georgia.

Durante e torneo di 15 dia, el a logra un record di 12 victoria y 3 perdida, empatando cu rival Atamifuji.

Iraninan ta lucha mientras recorte di internet ta afecta bida diario

(AFP) - Desconecta di internet global pa mas cu dos siman, creador di contenido online Amir ta pasa su dianan riba e poco website di noticia cu ta disponibel riba e web domestico di Iran, buscando señal cu conectividad cu mundo.

Amir, 32 aña, no a por produci mas su reseñanan di wegá di video y películanan desde 8 di januari, ora autoridadnan a impone un recorte di comunicacion sin precedente den medio di protestanan masivo contra gobièrno, cu segun mesun autoridadnan a laga mas cu 3.000 persona morto.

E recorte prolonga a afecta sectornan clave di economia, desde biahamento te exportacion, segun Iraninan na Teheran cu a papia cu AFP, y ta costando e pais miyones di dollar cada dia.

“Mi trabao ta depende completamente riba internet... sinceramente no por mira con mi ta sobrevivi sin dje”, Amir a bisa, ken ta traha cu plataforma di social media manera Instagram y YouTube.

El a bisa cu e restriccionnan a lag’e desmotiva y cada biaha mas preocupa riba su entrada y futuro.

Manifestacionnan nacional contra e costo di bida na Teheran riba 28 di december, cu a cuminsa como protesta pacifista prome cu el a bira loke autoridadnan a describi como “protesta violento instiga den e pais”, cu a inclui morto y vandalismo.

E cifra oficial di morto ta 3.117, pero NGOnan internacional

a presenta cifranan mas halto.

E protestanan a baha, pero e restriccionnan di internet ta sigui na vigor, cu canciyèr di Iran a hustifica como necesario pa enfrente operacionnan “terrorista” den pais. Gruponan di derecho humano, sinembargo, ta bisa cu e recorte a ser imponi pa tapa un represion di gobièrno contra manifestantenan.

Miyones di Irani a keda dependiendo di e internet di pais, cual ta sostene un gama amplio di aplicacionnan domestico mientras e ta mantene usuarionan aisla for di mundo.

Bus, metro, plataforma di pago online y banconan, como tambe serviccionan di transporte, nabegacion y entrega di cuminda, tur ta funciona riba internet, como tambe websitenan di noticia local.

Fin di siman pasa, media local a reporta cu aplicacionnan di mansahe domestico manera Bale, Eitaa y Rubika lo bolbe funciona atrobe.

Pero Amir a bisa AFP cu e “nunca a usa e aplicacionnan aki y no lo cuminsa awor”, mencionando preocupacionnan di privacidad.

Interupcionnan di vuelo

Sitionan di social media manera Instagram a sirbi como un mercado importante pa negoshi Irani, pero impacto economico di e restriccionnan di internet ta bay hopi mas leu.

Diadomingo, media local a cita vice-minister di Telecomunicacion Ehsan Chitsaz cu a bisa cu e recorte ta costa entre cuatro y seis triyon rial pa dia —



rond di \$3 te \$4 miyon.

Grupo di monitoreo di internet NetBlocks a duná un calculacion hopi mas halto, bisando cu cada dia ta costa Iran mas cu \$37 miyon.

Un agente di biahe, ken a prefera di keda anonimo pa motibo di seguridad, a bisa AFP cu reserva di vuelo internacional a bira “instabil”. Algun vuelo a ser cancela y pasaheronan a ser informa solamente ora nan a yega na aeropuerto, segun e ta bisa. “Negoshi a ser afecta, unda e cantidad di cliente cu ta yama mi cada dia pa reserva vuelo a baha”, el a agrega, señalando cu “vuelo domestico ta mas facil pa aregla”.

Iraj, un chauffeur di truck di 51 aña west di Iran cu ta transporta mercancia via frontera, a bisa cu procedementonan

administrativo pa carga y descarga di exportacion a baha su velocidad.

“Chauffeurnan tabata obliga wardaoras pa regla papelnan”, el a agrega.

Restriccionnan di internet a ser imponi den pasado durante periodonan di inkietud social na Iran, pero normalmente nan tabata mas cortico y mas limita.

Interupcionnan a sucede caba na 2009 durante manifestacionnan nacional contra e reeleccion di presidente Mahmoud Ahmadinejad.

Restriccionnan tambe tabata na vigor durante protestanan riba e subida di prijs di combustibel na 2019, durante manifestacionnan na 2022-2023 despues di e morto na custodia di Mahsa Amini, y durante e guerra di 12 dia cu Israel na juni aña pasa.

Amin, otro creador di contenido cu ta haci video di reseña di aparato tecnologico pa YouTube y Instagram, a bisa cu e tabata anticipando e restriccionnan e biaha aki, pero no un recorte asina largo ni asina severo.

“Antes nos tabata keha cu traha bao di e condicionnan aki tabata dificil, pero awor e ta afectando tur aspecto di nos sosten di bida”, e homber di 29 aña a bisa AFP.

No ta cla con largo e corte lo dura. Durante e ultimo dianan tabatin acceso irregular riba algun website for di e pais y servicio di email manera Google, pero e no tabata hopi confiabel.

“E unico cos optimista cu mi por bisa...ta cu mi no ta mira nan manteniendo internet completamente cera pa un tempo largo”, Amin a bisa.

Singapur lo inverti \$785 miyon den investigacion publico riba inteligencia artificial



(AFP) - Singapur lo inverti mas cu \$785 miyon den investigacion publico riba inteligencia artificial te 2030 pa fortalece su capacidadnan y mehora su competitividad global, segun gobièrno a anuncia diasabra.

E fondo lo permiti Singapur establece centronan di investigacion di “clase mundial”, construyendo capacidadnan pa sostene aplicacionnan industrial di inteligencia artificial y desaroyando talento a traves di asociacionnan cu investigador y institucionnan di e pais, segun e comunicado.

E iniciativa, anuncia pa Min-

ister di Desaroyo Digital y Informacion Josephine Teo durante un gala di un siman di investigacion riba AI diasabra, ta e ultimo den un serie di inversionnan gubernamental den inteligencia artificial.

E centro di investigacionnan lo concentra riba “preguntan dificil y a largo plazo” cu lo beneficia e pais, Teo a bisa.

“Nos ta spera pa nan colabora activamente cu otro actornan den nos ecosistema local y internacional. Nos tambe kier pa e descubrimientonan di investigacion ser comparti abiertamente, pa contribui na e patrimonio global di cono-

cemento”, el a agrega.

Singapur ta usando cada biaha mas tecnologia pa enfrente necesidadnan laboral y otro tipo di reto, considerando cu e pais no tin recurso natural comparabel cu su bisiñanan mas grandi.

“Investigacion ta sirbi como un motor clave den nos esfuersonan riba inteligencia artificial, impulsando e capacidadnan tecnico profundo di e nacion y sigurando cu Singapur ta keda na vanguardia di innovacion den AI”, segun e ministerio a expresa den un declaracion.

Accidente cu chauffeur herida na Palm Beach

Diabierna merdia a drenta informe di un accidente cu hende herida na Palm Beach, mesora a dirigi tanto polis como ambulance na e sitio.

Na yegada di e patruya a bin compronde cu e chauffeur di e MG a bay dal tras di un otro auto. Debi na e impacto e chauffeur di e MG a resulta herida. Na yegada di e ambulance nan atende e victima y a transport'e pa hospital.



Chauffeur a bay dal tras di auto na Bubali



Diabierna atardi a drenta informe di un accidente na e rotonde na Bubali, mesora a dirigi un patruya na e sitio.

Na yegada di e patruya a bin compronde cu aki ta trata di un accidente unda un chauffeur no a regula su velocidad ni a mantene distancia y a bay dal riba e auto su dilanti. Afortunadamente ningun hende a resulta herida.

Stuurwiel a kita for di e auto y e auto a bay dal otro staciona



Diabierna anochi a drenta informe di un accidente na e mall banda di rotonde Sasaki, mesora a dirigi un patruya na e sitio.

Na yegada di e patruya a bin compronde cu e stuurwiel a kita for di auto Toyota y el a bay dal riba un Kia K4 cu tabata staciona. Afortunada-

mente ningun hende a resulta herida.

Bomberonan a bay cu urgencia pa un candela cu tabata birando grandi na Catiri



Diabierna merdia a drenta informe di un candela cu ta birando basta grandi na Catiri, mesora a dirigi bomberonan na e sitio.

Na yegada di e bomberonan

a bin descubri cu e candela ta riba un tereno basta grandi y aleha den mondi asina mes e trucknan di bombero a haci nan trabao y a logra domina y paga e candela completamente.

Chauffeur di Honda Fit a perde control bay dal riba cura di cas



Diasabra mainta a drenta informe di un accidente cu hende levemente herida na Piedra Plat, mesora a dirigi tanto polis como ambulance na e sitio.

Na yegada di e patruya a bin

compronde cu debi na e caminda muha e chauffeur di e Honda Fit a slip riba caminda, perde control, bay dal y kibra cura di e cas. Na yegada di e ambulance nan a atende e victima levemente herida y a transport'e pa hospital.

Gobierno Iraki lo persigui y husga teroristanan di Estado Islamico transferi for di Siria

(Infobae) - E gobierno di Irak a anuncia cu combatidornan di e grupo yihadista, transferi for di centro di detencion na Siria bao mediacion di Merca, lo enfrenta investigacion y proceso penal nacional despues di un evaluacion di e forsa di seguridad di e pais.

E gobierno Iraki a confirma e decision aki diasabra, indicando cu teroristanan di Estado Islamico (IS) cu ta ser transferi for di prison y sitionan di detencion den Siria pa Irak lo ser persigui y husga conforme ley nacional. E anuncio a ser emiti pa e Consejo Hudicial Supremo di Irak, despues di un reunion di nivel halto entre lider politico y di seguridad.

Durante e reunion, autoridnan a discuti e decision di mas o menos 9.000 detenido di IS cu a ser deteni na Siria desde e disolucion di e grupo terrorista IS na 2019. E necesidad pa move e prisioneronan a surgi despues cu e forsa di e gobierno Sirio nobo luna pasa a saca for di e zona noordoost di Siria e combatientenan lidera pa e Kurdonan — cual tabata e aliadonan principal di Merca den e lucha contra IS — di regionnan cu nan tabata controla pa años y unda nan tabata guarda sitio cu prisioneronan di e grupo extremista.

Tropanan Sirio a tuma control

di e campamento grandi di Al-Hol — cu ta alberga miles di persona, mayormente famia di militancia di IS — for di forsa lidera pa Kurdonan, cual a retira como parti di un alto-al-fuego. Tropanan Sirio tambe a tuma control dialuna pasa di un prison den ciudad di Shadadch noordoost di Siria, unda durante e combate algun detenido di IS a logra huy. Media estatal Sirio despues a reporta cu hopi di nan a ser recaptura.

E enfrentamento entre e ejercito Sirio y e Forsa Democratico Sirio lidera pa Kurdonan a lanta preocupacion cu IS lo activa su celulanen drumi den e regionnan ey y cu detenidonan di IS lo logra huy. Bao di e acuerdo inicial entre e gobierno Sirio y e Kurdo, Damasco a declara cu lo tuma responsabilidad pa e prisioneronan.

Bagdad ta particularmente preocupa cu detenidonan di IS cu logra huy lo reorganisa nan mes y menasa seguridad di Irak y di su parti di e frontera largo cu Siria. Un bes na Irak, prisioneronan di IS acusa di terrorismo lo ser investiga pa e forsa di seguridad y husga den corte nacional, segun e Consejo Hudicial Supremo di Irak a informa.

E militarnan di Merca a cuminsa e proceso di transferencia diaranson pasa cu e prome grupo di prisioneronan di IS



cu a ser transferi for di Siria pa Irak. 125 otro prisionero a yega diasabra, segun dos oficial di seguridad Iraki cu a papia cu The Associated Press bao di condicion di anonimidad.

Te awor, 275 prisionero a yega Irak. Oficialnan a bisa cu e proceso ta bayendo slow, pasobra militarnan di Merca ta transportando e detenidonan den aire. Tanto Damasco como Washington a expresa nan apoyo pa e oferta di Bagdad pa transferi e prisioneronan pa Irak.

E parlamento Iraki lo reuni diasabra pa discuti e desaroy-

onan na Siria, unda e forsa di gobierno ta purba reforsa nan presencia na frontera.

E combate entre e gobierno Sirio y e Forsa Democratico Sirio a para, danki na un alto-al-fuego recientemente prolonga. Segun e ministerio di Defensa di Siria, e tregua a ser extendi pa facilita e operacion cu apoyo di e forsa di Merca.

E grupo Estado Islamico a ser derota na Irak na 2017 y na Siria dos año despues, pero celulanen drumi di IS ta sigui causa atake mortal den tur dos pais.

Como aliado clave di Merca den e region, e Forsa Demo-

cratico Sirio a hunga un rol importante den derota IS. Durante e batayanan contra e grupo, miles di extremista y miles di muher y mucha relaciona cu nan a ser captura y deteni den prisionnan y den e campamento di Al-Hol, cu ta alberga miles di muher y mucha.

Año pasa, tropanan di Merca y combatidornan alia cu SDF a detene mas cu 300 militante di IS na Siria y a mata mas cu 20. Na december, un atake di militantenan di IS a mata dos soldado Mericano y un interpretador civil Mericano na Siria.

Merca y Israel ta alinea riba e siguiente pasonan pa e segundo fase di plan pa Gaza



(Infobae) - Despues di e reunion cu el a tene diasabra cu Netanyahu, e enviado Mericano a bisa cu tur dos pais ta di acuerdo “riba e importancia di sigui cu cooperacion

riba tur asunto critico pa e region”.

E enviado special di Merca pa Medio Oriente, Steve Witkoff, a declara diadomingo cu Washington y Israel ta alinea

riba e siguiente pasonan den implementacion di e di dos fase di e plan di 20 punto pa Gaza, despues di un reunion cu el a tene ayera cu prome minister di Israel, Benjamin Netanyahu.

Segun Witkoff, e reunion — unda un delegacion di Merca, tambe componi di Jared Kushner, Aryeh Lightstone y Josh Gruenbaum, a participa — a trata e progreso y planificacion di e di dos fase di e “plan di pas” pa Gaza, proponi pa presidente di Merca, Donald Trump.

Tambe diasabra, un serie di reunion a tuma luga entre e hefe di Comando Central di Merca (CENTCOM), almirante Brad Cooper, y e hefe di Estado Mayor General di Israel, teniente general Eyal

Zamir, segun un comunicado publica awe door di e Ejercito Israeli.

Netanyahu a acepta diaranson e oferta di presidente di Merca, Donald Trump, pa uni na e Junta di Paz estableci pa e magnate, ken lo supervisa e desaroyo di e acuerdo di alto-al-fuego na Gaza, unda su di dos fase a cuminsa oficialmente diaranson pasa.

Witkoff, negociador di e plan, a splica cu e fase aki ta contempla e creacion di un gobierno Palestino transitorio di caracter tecnocratico, yama e Comité Nacional pa Administracion di Gaza, como tambe e desmilitarisation y reconstruccion total di e enclave, ademas di e desarmamento di tur personal no autorisa.

Jared Kushner a toca e tema aki diaranson na Davos (Suiza), en particular e desmilitarisation di Gaza — e punto cu ta causando mas friccion na Israel — y a afirma cu e movimiento Islamico Palestino Hamas mester entrega prome su armanan pisa y despues, gradualmente, facilita armanan, sin duna fecha specifico.

E Administracion di Donald Trump tambe a presenta diaranson su plan di reconstruccion pa e yama “nobo Gaza”, pensa como un proyecto urbano ambicioso yen di edificio halto, den un teritorio di dos milyon habitante devasta pa mas cu dos año di ofensiva militar Israeli.

Directie Natuur en Milieu (DNM) ta cera pa
publico pa celebra Dia di Betico dia 26 di
januari 2026

Den cuadro di observacion y celebracion di Dia di Betico 2026, DNM su oficina situa na edificio monumental di Uncle Louis Store na B. v/d Veen Zeppenfeldtstraat#7, San Nicolas ta cera pa publico dialuna 26 di januari 2026. DNM ta habri back diamars 27 di januari pa 7:30 am.

Pa cualquier eventualidad por

manda nos un mensahe via nos plataforma di Facebook messenger. Pa melding di emergencia cu tin di haci cu naturalesa y medio ambiente por haci esaki via KPA Polis.

Alabes DNM ta desea un y tur feliz ‘Dia di Betico’. Un di defunto Betico Croes su dichonan mas recorda ta esun aki: “No tin lucha sin sacrificio, no tin sacrificio

sin gloria”. Esaki ta local
nos ta desea refleha riba
dje pa cu e lucha pa protec-
cion di nos sortonan protegi.
Nos ta hunto luchando pa
conservacion di nos fauna
protegi manera e shoco, pri-
kichi, patrishi sin lubida nos
flora protegi manera cadushi,
bushi y tuna. Ta hunto nos ta
celebra con e sortonan aki ta
keda herencia pa futuro ge-
neracion, esey ta e gloria.



Grupo di Proyecto Pro Freres de La Salle ta puntra atencion y cooperacion pa siguiente proyectonan

Manera ta conoci, den siglo pasa e Freres de la Salle a lanta y duna enseñanza na diferente scol di mucha homber na Aruba. Diferente di e grandi-nan masculino ta recorda diferente experiencia di e añanan aki. Cerca nan tambe ta conoci e cantidad di tempo cu e Freres a

**inverti na e guia y forma-
cion di nos hobennan pafo
di oranan di scol.**

Nan tabata e fundador di diferente club di deporte cu te ainda ta existi y ta activo. Tambe riba tereno cultural nan tabata activo. Hopi di nos ta recorda e añanan glorioso di “De Trupialen” cu bao di

guia di Frere Alexius a entre-
tene grandi y chikito cu nan
canto y teatro.

For di comienso di 1937 te cu mei 2000, Freres de la Salle a forma parti di nos comunidad Arubiano y nan herencia y impacto tabata grandi. Sinembargo mientras e añanan ta progresando e recuerdo

y impacto di e Freres ta bira vago den nos memoria. For di punto di bista historico e ta bal pa mantene den nos memoria, nan trabao incondicional sin propio interes den nos comunidad. Nan ta merece un lugar di honor riba nos isla.

Na januari 2025 un grupo di

persona cu un sentimento nostálgico y di gratitud a lanta cu e idea pa conserva e memoria di nan impacto incondicional pa futuro y a lanta Grupo di Proyecto Freres de la Salle.

Grupo di Proyecto Freres de la Salle a dicidi pa realiza un proyecto consistiendo di tres parti, esta construccion di un monumento; publicacion di un buki di conmemoracion y produci un documentario di nan trabao na Aruba.


Pa realisa esaki ta puntra e cooperacion y participacion di ex alumnonan. E intencion ta pa realisa tur e tres subproyectonan ariba mencionada pa 2027, e aña cu lo e ta 90 aña pasa cu e prome Frere a yega Aruba.

Pa e realisacion di e proyec-
to aki obviamente lo mester
placa. E suma presupuesta
ta Afl. 495.000,00. E grupo
di Proyecto actualmente ta
acerca diferente organisacion
y comercio pa recauda fondo
pa cubri e gastonan di reali-
sacion. Pero dor cu ta con-
sidera e proyecto aki como
un expresion di gratitud pa
tur locual e Freres de la Salle
a haci pa Aruba ta pidi e co-
munidad Arubiano pa tambe
contribui na e gastonan pa
asina realisa e proyecto con-
memorativo bunita.

Nos ta conta cu bo contribu-
cion generoso riba nos cuen-
ta di banco na Aruba Bank.

Riba number: Stichting
Huize De La Salle
Primavera 1-B, Sabana Blan-
co, Mahuma
Aruba Bankrekening:
762.810.0190
Swift Code: ARUBAWAX

[illegible]



Cas Di Cultura

Vondellaan 2 Aruba
297-582-1010

F A D A

Campanastraat 5 Aruba
297-583-2999
297-583-9610

F A V I

Primavera 233 Aruba
297-582-5051
297-582-5222

F E P O

Engelandstraat 15 Aruba
297-583-1016
297-583-6607

**Fundacion Contra
Violencia Relacional**
Tel: 583-5400

Fundacion Autismo Aruba

Irenestraat 21 Aruba
297-588-1179

Fundacion Pa Nos Muchanan

Cumana 2 Aruba
297-583-4247

Fundacion Tel Pa Hubentud

Wilhelminastraat 19
Aruba
297-588-6138

Koningin Wilhelmina Fonds

Spinozastraat 9 Aruba
297-582-0412

Mary Joan Foundation
Sabana Blanco 8 Aruba
297-588-9999

Rode Kruis Aruba

Pedro Gallegostraat 14
Tel. 297-582-2219
Fax 588-3376

Famia Planea (SBVO)

Avenida Milio J Croes 17
B Aruba
297-588-9591
www.famiaplanea.org
famiaplanea@hotmail.com

Stichting Fundacion Guia Mi

George Madurostraat 34
297-582-0088

Y M C A

Calbasstraat 1 Aruba
297-582-3072

AL-ANON group

Sabana Liber #8, Noord
(close to the hotels)
Tel: 736-2952 or
593-7081



Dokter na warda

Oranjestad San Nicolas
Hospital Imsan
7:00 pm / 10:00 pm **24 ora**

Botica na warda

Oranjestad: San Nicolas:
Eagle : Centro Medico:
Tel. 587 9011 Tel. 584 5794

EMERGENCIA 911

POLIS

Oranjestad	100
San Nicolas	104
Santa Cruz	105
Noord	107
Tip Line	11141
Brandweer	115
Ambulance	911
Hospital	527-4000
Imsan	524-8833
Warda Costa	913
Seguridad Nacional	11911
Cruz Cora	582-2219

BOTICA

Aloe	584-4606
4 Centro Medico	584-5794
Central	585-1965
Dakota	588-7364
Del Pueblo	582-1253
Eagle	587-9011
Kibrahacha	583-4908
Maria	585-8145
Di Servicio Noord	586-4606
Oduber	582-1780
Paradera	588-6638
San Lucas	584-5119
Santa Anna	586-8181
Santa Cruz	585-8028
Sero Preto	584-4833
Trupial	583-8560

UTILIDAD

Setar	117
Web	525-4600
Elmar	523-7147

FUNERARIA

Aurora	588-6699
Royal Funeral H.	586-4444
Ad Patres	584-2299
Olive Tree	584-8888

Aruba Transfer Tour & Taxi C.A.

Tel: 582 2116 / 582 2010

Taxi Adres Services (24h)

Tel. 587 5900

A1 Taxi Services Aruba

Tel: 587-8850
Tel: 280-2828
Whatsapp: 592-7024

Fanaticonan ta despedi di Hapon su unico pandanan



(AFP) - **Fanaticonan di Panda na Tokyo a despedi diadomingo di un par di panda popular cu lo regresa China, lagando Hapon sin e bestianan stima pa prome biaha den mita di un siglo.**

Presta como parti di China su programa "panda diplomacy" e bestianan stima aki ta simbolisa amistad entre Beijing y Tokyo desde cu a normalisa lasonan diplomatico den 1972.

Algun bishitante na Ueno Zoological Gardens a keda cu wowo na awa mientras nan tabata mira Hapon su unico dos panda Lei Lei y Xiao Xiao come bamboos.

E bestianan ta anticipa di bay China diamars despues cu e relacion entre dos di Asia su economia mas grandi a enfrente dificultad.

"Mi ta sinti cu mira panda por yuda crea un conexon cu China tambe, pues den e sentido ey mi realmente lo kier pa panda bin back Hapon," Gen Takahashi, un residente di 39 aña cu a bishita e zoologico cu su casa y yiu muhe di 2 aña a comenta.

"Muchanan stima panda

tambe, pues si nos por mira nan cu nos propio wowo na Hapon, mi definitivamente lo kier bay."

E pandanan su regreso repentino a keda anuncia luna pasa despues cu Hapon su prome minister conservativo Sanae Takaichi a duna señal cu Tokyo por interveni militarmente si algun atake contra Taiwan tuma luga.

Su comentario a provoca rabia di Beijing, cual ta considera e isla su propio territorio.

E 4.400 ganador di un loteria online a tuma turno ta bira e morochonan na Ueno Zoo mientras cu otro nan tabata reuni alrededor, varios cu T-shirt cu tematica di panda bisti, tas y popchi pa celebra e momento.

Mayuko Sumida a biaha varios ora for di e region central Aichi cu speransa di mira nan a pesar di no a gana e loteria.

Nan partida posiblemente no ta politicamente motiva, pero si panda regresa Hapon den futuro e por simbolisa un mehoracion den e relacion, segun Masaki Ienaga a comenta.

Pronostico di tempo



Tempo:

Awe tardi y awe nochi: parcialmente nubla y generalmente seco

Den marduga y mañan: parcialmente nubla cu un awasero localmente

Temperatura maximo 31 grado celsius

Temperatura minimo 26 grado celsius

Indice di calor (heat index) den y rond di oranan di merdia: 32 pa 36 grado celsius

UV index: 9

Bahada di solo : 6:37 pm
Subida di solo : 7:06 am

Biento:

Moderate for di direccion generalmente oost;
Forsa 3 te 4 (12 te 30 km/ora, 7 te 16 nudo).
Durante di dia basta fuerte den rafaga;
Forsa 5 (31 te 39 km/ora, 17 te 21 nudo)

Situacion general di tempo pa proximo 24 ora:

Extension di e area di presion halto den Atlantico lo ta e factor principal den e tempo regional. Esaki lo sostene y biento modera te basta fuerte cu por yega fuerte den rafaga. Ademas esaki lo reduci e nivelnan di humedad den region lo cual lo limita e posibilidadnan di awasero.

Condicionnan mari- timo/estado di lama:

Na partinan protegi di costa: Keto cu olanan rond di 1 pia.

Na partinan zuid: trankil cu olanan di 1 te 2 pia.

Na partinan oost te noordwest di costa: Modera cu olanan alrededor di 3 pa 5 pia, localmente e por yega 6 pia.

TA BUSCA

Handyman 2026
Yama awo
742 7701 - 562 1942
8:00 am - 5:00 pm
Garantiza


220074



FIND US ON

facebook
@bondianoticia

ALSO AVAILABLE ON



Aurora

Royal Pray

Funeral Home & Crematory

"Dios ta amor... y amor ta Dios,
maske mi no ta na e mundo aki,
tur dia lo mi ta banda
di boso Curazon, mi por stens di
loke Señor ta hasi"
Salmo 33



Omaira Josefina Marval
*25-08-1948 †23-01-2026

Acto di entierio lo wordo anuncia despues.

Aurora

Royal Pray

Funeral Home & Crematory

"Señor ta mi wardador, mi'n tin
falta di nada
Den cunucu di yerba berde e ta
ponemi sosega.
E ta hibami na awa trankil,
Pa mi bolbe haña forsa".
Salmo: 23



Clara Tomasa Maduro
*29-12-1945 - †22-01-2026

Acto di entierio lo wordo anuncia despues.

Aurora

Royal Pray

Funeral Home & Crematory

"Señor ta mi wardador,
mi'n tin falta di nada.
Den cunucu di yerba
berde e ta pone mi sosega.
E ta hiba mi na awa
trankil,
pa mi bolbe haña forsa".
Salmo: 23



Cu dolor na nos curason, pero conforme cu
boluntad di Dios, nos ta participa fayecimento
di nos ser stima:

Rosa Maria Duarte
*24-09-1933 - †21-01-2026

Acto di despedida lo wordo anuncia despues

Aventurero Mericano a escala e edificio mas halto di Taiwan sin cabuya



(AFP) — Un escalador Mericano a enfrenta diadomingo e edificio mas halto di Taiwan, birando e prome hende cu a escala Taipei 101 sin cabuya, sin harness y sin net di seguridad.

Centenares espectador a reuni na e base di e toren di 101 piso pa mira Alex Honnold, di 40 aña, cuminsa su hazaña riesgoso, cual a ser transmiti bibo riba Netflix.

Despues di un ora y mei, el a logra subi 508 meter y despues a descende pa reuni cu su esposa, Sanni McCandless Honnold. Papiando den un conferencia di prensa despues, Honnold a bisa cu "tempo ta limita" y cu hende mester "usa esaki di mihor manera".

"Si bo traha hopi duro...bo por logra cosnan difícil," Honnold a agrega.

Honnold ya a conquista algun di paisahenan di piedra mas intimidante na mundo y a haya fama mundial na 2017 despues cu el a escala "El Capitan" na Yosemite, considera entre su coleganan como e punto mas halto di dificultad tecnico riba e enorme monolito di granit.

El a bisa reporteronan cu semper tabata un sueño di dje pa agrega e escalada di Taipei 101 na su lista di logronan, agregando cu su prome peticion a ser rechasa. E no a duna mas detaye pakico.



"Pa e proyecto bay door mas cu un decada despues...ta algo increíble. Wak ki oportunidad, e tabata un placer enorme," el a agrega.

Honnold ta e prome persona cu a haci un escalada liber di Taipei 101, sin cabuya, sin harness y sin net di seguridad, pero e no ta e prome cu a yega su punto mas halto.

Na 2004, Alain Robert, conoci como "e Spiderman Frances", tabata e prome cu a enfrenta e reto, pero el a usa cabuya di seguridad pa via di condicionnan di yobida. E espectáculo diadomingo a atrae centenares persona. Richard Bode, di 34 aña, a yama e evento "un experiencia unico".

Benson, di 24 aña, a bisa AFP cu Honnold tabata "increíblemente balente", mientras cu otro, manera Lin Chia-jou di 54 aña, a bisa cu e tabata "horrible" pa wak.

Presidente di Taiwan Lai Ching-te a felicita Honnold den un publicacion riba Facebook diadomingo, yamando e reto "realmente conmovedor".


"E escalada tabata tenso, poniendo curason bati duro," el a agrega.

E evento, titula "Skyscraper Live", tabata programa pa ser transmiti riba Netflix diasabra pero a keda posponi pa motibo di mal tempo. Bisti cu un T-shirt cora y sapato di escalada geel diseña specialmente p'e, Honnold a move rapido riba e cara di e edificio di glas y acero diadomingo ora clima porfin a permiti.

Na dado momento, el a para riba un plataforma na mitar caminda pa saluda fanaticonan y espectadornan cu tabata tumando potret.

Hende cu tabata mira di paden di e edificio a keda boca habri y tabata toca e glas mientras Honnold tabata pasa cerca di e deck di observacion cera riba piso 89.

President di Taipei 101 Janet Chia a bisa diasabra riba Threads cu tabata emocionante pa scucha cu fanaticonan a biaha for di Singapur, Hong Kong y sur di Taiwan pa mira e escalada, y el a pidi disculpa pa e retraso di e evento.



Aurora

Royal Pray

Funeral Home & Crematory

Ki alegría, ora nan a bisa mi:
"Ban cas di Señor!"
I awor, ata mi aki para na bo porta Señor.
Salmo 122



Cu dolor na nos curason, nos ta participa fayecimento di:

Sixto M. Coffy
"Lulu"

*06-04-1940 - †22-01-2026

Acto di entierio lo wordo anuncia despues

Tin 'riesgo di violencia masal contra ciudadanonan' na Sur Sudan, segun expertonan di UN

(AFP)—**Situacion na Sur Sudan ta elevando "e riesgo di violencia masivo contra ciudadanonan", expertonan independiente di UN a adverti diadomingo, mientras conflicto nobo y retorica violento ta domina e pais.**

Comision di UN pa Derecho Humano na Sur Sudan a expresa "alarma serio" tocante combatenan den estado Jonglei, den norte di e capital Juba, unda testigonan a describi ciudadanonan cu ta huyendo pa pantanonan.

Mas despues diadomingo, vocero di South Sudan People's Defence Forces (SSP-DF), Lul Ruai Koang, a bisa residentenan di Jonglei pa "evacua inmediatamente" areanan controla pa Sudan People's Liberation Army in Opposition (SPLA-IO) y move pa "areanan controla pa gobierno lo mas pronto posible".

Ciudadanonan "lo ser considera como obhetivo militar legitimo", e vocero a agrega.

E pais mas jong di mundo a ser asota pa guerra, pobresa y corrupcion desde cu el a ser forma na 2011, unda violencia ta creciendo awor entre fraccionnan rival.

Un acuerdo di comparticion di poder entre e dos partido principal ta practicamente morto despues cu presidente Salva Kiir a actua contra su vice-presidente y rival di hopi aña, Riek Machar, ken a ser aresta na maart aña pasa y awor ta den huicio pa "crimen contra humanidad".

Nan orsanacion a enfrenta otro varios biaha den e ultimo aña,

pero e conflicto mas sosteni a cuminsa fin di december na Jonglei.

Declaracionnan publico di comandantenan cu ta animando violencia contra ciudadanonan, hunto cu mobilisacion di tropa, "ta representa un escalacion peligroso na un momento unda e base politico di e proceso di paz ya ta gravemente debilita," e comision di UN a bisa.

Hefe di ehercito Paul Nang Majok a duna orden dianson cu tropanan desplega den region mester "aplata e rebellion" dentro di siete dia.

Medionan local tambe a cita un oficial halto di ehercito cu a bisa cu "ningun hende mester ser pordona, ni sikiera e ancianonan".

Mision di UN na Sur Sudan (UNMISS) a bisa cu e ta "hopi preocupa" riba e declaracionnan publico. "Retorica inflamatorio cu ta haci yamado pa violencia contra ciudadano, incluyendo esnan mas vulnerable, ta completamente abominable y mester stop awor mes," hefe di UNMISS Graham Maitland a bisa.

Combatenan renoba na Sur Sudan ya a desplasa mas cu 180.000 hende, segun autoridadnan di e pais.

Kiir y Machar a bringa un guerra di cinco aña poco despues di e independencia cu a tuma 400.000 bida. Un acuerdo di comparticion di poder na 2018 a mantene paz pa algun aña, pero plannan pa tene un eleccion y uni nan ehercitonan nunca a materialisa.



Merca lo impone tarifa di importacion completo riba Canada si Ottawa finalisa acuerdo comercial cu China

(AFP)—**Merca lo impone tarifa di 100% riba importacionnan Canades si Ottawa finalisa un acuerdo comercial nobo cu China, secretario di Tesoreria di Merca Scott Bessent a bisa diadomingo, reforsando un menasa similar cu presidente Donald Trump a haci un dia prome.**

"Nos no por laga Canada bira un apertura pa China yena Merca cu nan mercancía barata," Bessent a bisa riba e programa "This Week" di ABC.

Durante un bishita na Beijing dia 16 di januari, prome ministro Canades Mark Carney a anuncia un descongelamento den relacion bilateral cu China, bisando cu e dos pais a yega na un "asociacion strategico nobo" y un acuerdo comercial preliminar.

Bao di e acuerdo, China lo reduci tarifa riba importacion di canola for di Canada pa mas o menos 15% pa 1 di maart, un bahada for di e 84% actual.



China tambe lo permiti bishitantenan Canades drenta e pais sin visa. Di su parti, Canada lo importa 49.000 vehiculo electrico (EV) Chines bao di un tarifa preferencial nobo di 6,1%.

E acuerdo a yega memey di un guerra comercial cu Canada, unda e administracion di Trump ta imponiendo derecho di importacion riba su bisiña den norte.

Ora presentador Jonathan Karl di "This Week" a pidi

Bessent pa aclara si Merca realmente lo cumpli cu e menasa cu Trump a haci diasabra pa impone tarifa di 100% riba importacionnan Canades, hefe di Tesoreria a contesta: "Tin posibilidad di un tarifa di impuesto di 100% si nan haci un acuerdo di comercio liber."

El a agrega cu e tarifa di impuesto nobo lo ser imponi "si nan bay mas leu, si nos mira cu Canadesnan ta permiti China dump mercancía."

Estudio: Casi mitar di agencianan di real estate na Francia ta permiti racismo

(AFP)—**Casi mitar di e agencianan di real estate na Francia ta acepta of ta facilita discriminacion racial den acceso na vivienda, segun un encuesta publica diadomingo.**

Grupo anti-discriminacion "SOS Racisme" a tuma contacto cu 198 agencia di real estate na 2025, haci manera nan ta doño di cas y pidiendo huurdonan "Europeo" como un manera pa evita "problemanan di bario".

Di e 198 agencia, 48 (24,2%) a permiti seleccion di huurdonan riba un base asina, mientras cu otro 48 a permiti of anima e supuesto doño pa haci e seleccion nan mes, segun e rapport revela pa Le Parisien.

Esaki ta bisa cu casi mitar a anima of a facilita prehuicio racial, mientras 102 agencia (51,5%) a nenga discrimina y explicitamente a opone seleccion di huurdonan basa riba

criterio racial.

E encuesta "ta destaca un persistencia preocupante di practicanan discriminatorio cu ta prohibi bao di ley penal", SOS Racisme a bisa den un comunicado di prensa.

Minister di Igualdad Aurore Berge, reaccionando riba e resultadonan, a bisa Le Parisien cu "e rapport di SOS Racisme ta muestra cu ainda tin hopi trabao pa haci" y a reitera cu "discriminacion ta ilegal".

Berge a anuncia e introduccion di entrenamiento obligatorio contra discriminacion pa tur agente di real estate. Actualmente, entrenamiento ta obligatorio solamente pa esnan cu tin licencia profesional—menos cu mitar di tur agente.

El a bisa cu por anticipa un decreto "den e simannan binidero".



SOS Racisme a conduci encuestanan similar na 2019 y 2022, y e resultadonan mas reciente no ta muestra mehoracion: na 2022, 48,5% di 136 agencia a acepta directamente (25%) of a facilita (23,5%) petitionnan discriminatorio.

Den un carta dirigi na parlamentarionan, presidente di SOS Racisme Dominique Sopo a haci yamado diadomingo riba diputadonan pa "papia fuerte y cla" contra discriminacion.

Ayudo critico a yega na ciudad di mayoria Kurdo, segun UN

(AFP)—Ayudo humanitario di UN a yega diadomingo na ciudad Kobane, unda gran parti di e poblacion ta Kurdo, yen cu hende desplasa pa motibo di conflicto reciente den norte di Siria, un vocero a bisa AFP.

Mas tempran diadomingo, ehercito di Siria a bisa cu a habri un ruta humanitario pa e ciudad, tambe conoci como Ain al-Arab den Arabe, cual un biaha tabata simbolico di victoria di hungadornan Kurdo contra jihadistanan di Estado Islamico (IS).

E ayudo a yega mientras autoridadnan Sirio y forsanan Kurdo a extende un acuerdo di alto-al-fuego despues cu forsanan Kurdo a entrega gran parti di teritorio na tropnan di gobierno.

Mas prome den siman, residentenan di Kobane a bisa AFP cu nan tabatin falta di cuminda, awa y energia, y cu e enclave tabata yen di hende cu a huy for di avance di e ehercito Sirio.



Vocero di e agencia di refugiado di UN, UNHCR, na Siria, Celine Schmitt, a bisa AFP cu “e convoy a yega”. Agencia humanitario di UN, OCHA, a bisa mas tempran riba X cu e convoy di 24 truck tabata carga “ayudo cu ta salba bida, incluyendo combustible, pan y racionnan cla pa come, pa sostene hende afecta pa e desaroyonan reciente”.

Segun UN, e convoy a ser coordina cu gobierno di Siria. Den un declaracion, ehercito

di Siria a bisa cu a habri dos ruta, un pa Kobane y un otro den provincia Hasakeh cercano, pa permiti “entrada di ayudo”.

Kobane ta keda rondona pa e frontera Turco den norte y forsanan di gobierno na tur banda. E ta mas o menos 200 kilometer for di e bastion Kurdo den zuidoost Siria.

Forsanan Kurdo a acusa e ehercito Sirio di impone un redada riba e ciudad.

‘Catastrofe’

Diasabra, gobierno di Siria y forsanan Kurdo a extende un alto-al-fuego di cuatro dia pa 15 dia, cu Damascus bisando cu esaki tabata pa apoya transferencia di detenidonan di IS pa medio di Merca for di Siria pa prisonnan na Irak, cual a cuminsa mas tempran den siman aki.

Forsanan Democratico Sirio (SDF), cual ta ser guia pa Kurdonan, a perde areanan

grandi danki na e forsanan di gobierno durante e conflicto cu a dura varios siman, y awor ta limita na areanan cu mayoria Kurdo den region noordoost y Kobane.

Kobane, cual forsanan Kurdo a libera for di un invasion largo di IS na 2015, a bira un simbolo como nan prome victoria grandi contra e jihadistanan.

A tuma cuatro aña mas pa SDF, cu apoyo di un coalicion internacional lidera pa Merca, derota e jihadistanan teritorialmente na Siria.

Autoridadnan Islamita nobo di Siria ta exige pa SDF disolve, y Washington a bisa cu proposito di su alianza cu SDF den gran parti a yega su fin.

Diasabra, partido pro-Kurdo DEM di Turkia a bisa cu e situacion na Kobane a escala for di un crisis pa un “catastrofe mortal”, despues cu a manda un delegacion pa bishita e ciudad.

Hopi ta keda rabia despues cu a haya curpa di muher sin cabes den bari di sushi na Istanbul

(AFP)—E curpa decapita di un muher, unda su pia tambe tabata corta, a ser haya den un bari di sushi na Istanbul durante anochi, medionan Turco a reporta diadomingo, provocando rabia entre gruponan pa derecho di hende muher.

Su curpa tabata lora den un clechi y tira den un container di sushi den e distrito Sisli, unda un colector di papel cu tabata buscando cosnan pa recicla a descubri esaki diabierna anochi, segun agencia di noticia DHA.

Investigadornan a identifica e victima como un ciudadano Uzbek di 37 aña.

Nan no por a haya e cabes ni e pisanan di e victima inmediatamente, pero ora nan tabata revisando grabacionnan di camara di seguridad den e area, nan a nota dos homber cu a tira un maleta den un otro bari. No tabata inmediatamente cla kico esaki tabata contene.

Algun ora despues, polis a detene dos sospechoso, tambe ciudadanonan Uzbek, na Aeropuerto di Istanbul mientras nan tabata purbando di bandonar e pais, DHA a bisa. Mas despues, nan a aresta un di tres sospechoso.

Gruponan pa derecho di hende muher a expresa indignacion, ya-



mando pa manifestantenan uni na dos marcha di protesta na Istanbul y Ankara.

Un multitud grandi a reuni na stacion di metro Osmanbey na Sisli, cargando carton cu frasenan manera “Para violencia masculino!”, “Nos ta exige husticia pa muhernan asesina” y “Muhernan migrante no ta nan so”, segun material di e NGO.

“Muhernan no lo keda silenciosa mas!” e multitud tabata grita mientras nan tabata marcha pa e luga unda a haya

e curpa di e muher. A calcula cu tabatin mas di mil persona na e manifestacion.

‘Confiansa den nan inmunidad’
Na Ankara, centenares mas a marcha durante un protesta convoca pa plataforma Stop Femicides, cual a exige responsabilidad pa e muher asesina na Sisli.

“E perpetradornan tabata asina hopi confiansa cu nada no lo pasa nan, cu nan por simplemente laga e curpa di e muher cu nan a mata den un bari

di sushi den bista di tur hende,” Isil Kurt di Stop Femicides a bisa den un declaracion.

“Aunke añanan ta pasa y ciudad y nomber ta cambia, violencia contra muher ta keda mescos.”

Turkia no ta compila cifranan oficial riba femicidio, lagando e tarea aki na organisacionnan di hende muher cu ta recoge dato riba asesinato y otro mortonan sospechoso for di reportanenan di prensa.

Cifranan compila pa Stop Femicides ta muestra cu na 2025, 294 muher a ser mata pa homber y 297 muher a ser haya morto den circunstancianan sospechoso.

Alcalde encarcela di Sisli, Resul Emrah Sahin, ken a ser aresta mas o menos durante e mesun tempo cu alcalde di Istanbul Ekrem Imamoglu den un represion cu hopi hende ta mira como politicamente motiva, a bisa cu asesinatnan manera esaki ta un “problema social grandi”.

“Femicidio ta birando un masacre cu ta sigui crece por medio di impunidad, negligencia y silencio,” el a skirbi riba X, exigiendo accion coordina pa enfrenta e problema.



S.A.D.A.
Sindicato di Aduana Aruba



26 JANUARI

Dia Internacional *di Aduana*

Awe 26 Januari dia Internacional di Douane
un dia pa sinta y reflecciona.
Un dia unda hombernan y muhernan balente
ta traha pa hiba e Pais aki padilanti.
SADA kier felicita tur hende cu ta traha na
Cuerpo di Aduana, un pabien grandi na
bosonan.

Pabien!!



Homber asesina pa agentenan federal Mericano tabata enfermero “cu kier a haci un diferencia”

(AFP) - E ciudadano Mericano cu agentenan federal di Merca a tira mata tabata un enfermero di unidad di cuidu intensivo na un hospital local cu “tabata kier haci un diferencia den e mundo aki,” su familiarnan a bisa.

Alex Pretti, di 37 aña, a ricibi tiro fatal durante un enfrentamento cu oficialnan di migracion na e ciudad di Minneapolis, menos di 3 siman despues cu un oficial di ICE a los tiro fatal riba Renee Good, tambe di 37 aña, den su auto.

E asesinato mas recien aki a causa manifestacion nobo y rechazo di oficialnan local, kende a desafia e declaracion di Trump su administracion cu Pretti tabatin intencion di causa daño na e agentenan federal mientras e tabata participa den manifestacionnan contra operacion di inmigracion.

Pretti tabata “un alma cu un curason grandi cu tabata



cuida di su famia y amistadnan profundamente” y esnan cu el a cuida na Minneapolis Veterans Affairs (VA), su mayornan a comparti den un declaracion.

“Alex tabata kier haci un diferencia den e mundo aki. Desafortunadamente, e no lo ta cu nos pa mira su impacto,” su mayornan a sigui declara.

Dimitry Drekonja, hefe di Seccion di Malesa Infeccioso na Minneapolis VA Hospital y un colega di Pretti, a yam’e un “persona bondadoso cu a biba pa yuda. E tabatin asina

un gran actitud. Nos tabata papia entre pashent tocante purba di bay core bais hunto. Awo nunca esey lo pasa,” Drekonja a skirbi riba e plataforma di red social Bluesky. El a bisa cu Pretti tabata un enfermero cu ta traha pa “sostene veteranonan cu ta criticamente malo.”

Pretti a gradua for di Green Bay, Wisconsin, na 2006 segun reportahenan den media local. El a bay scol pa bira enfermero prome cu el a uni VA. Oficialnan di administracion di Trump a busca pinta Pretti como un agresor



violento pero nan version ta contradeci pa video, cual AFP no a verifica, cu media Mericano ta usando ampliamente.

Pretti su mayornan a bisa cu el a para dilanti un agente federal cu a pusha un manifestante femenino poco prome cu su morto.

Nan a denuncia loke nan ta yama “mentira grandi” di administracion di Trump y a bisa cu e arma haya riba Pretti, cual oficialnan local ta bisa e tabatin licencia pa carga, no tabata den su man ora cu el a ricibi e tiro fatal “Alex

claramente no tin un arma di candela den su man ora cu Trump su bandidonan di ICE a atak’e,” su mayornan a bisa den e declaracion. “E tabatin su telefon na su man drechi y su man links bashi tabata hisa riba su cabes mientras e tabata purba di proteha e muhe cu ICE a caba di benta abao, tur mientras tabata spray ‘pepper spray’ den su cara.”

E famia a pidi publico pa plama “e berdad tocante nos yiu homber. E tabata un bon hende. Nos tin nos curason kibra pero tambe nos ta hopi rabia,” nan a declara.